

ASO LUA, 14 MATI 2023

Na toe faaauau Taualumaga a le Fono Aoaofaitulafono i le itula e 2:00 i le afiafi.

FOFOGA FETALAI: Ou te faasilasila atu ua toe amatalia nei Taualumaga a le Fono Aoaofaitulafono. E i ai le manatu ua toaiu le asaga ma le utugavai e ala i le tauteaga sa alo i ai le paia o le Palemene ma le Maota. E faaosofia foi i le moe ma le utaga mau aua le faaauauina o le tatou galuega. Ia faamalo onosai i le tatou Maota i le taumafaiga o le tatou galuega, ua molimaui lava le tamaoiga o tofa sasaa e ala i finagalo faaalua ia tatou felafolafoaiga, malo tapena.

E faataatiaese tatou Taualumaga mo le malologa ua maea le saunoaga a le sui usufono mo Salega 1, e uiga i le lipoti a le Komiti ma tali a le Malo.

O le avanoa leni mo se tasi o sui usufono mamalu e fia saunoa. Tulai mai le sui usufono mo Aleipata Itupa i Luga.

Afioga FUAAVA SULUIMALO AMATAGA: E faafetai i lau afioga i le Fofoga Fetalai mo le avanoa. E talitonu foi o leni itula, o lea ua saioalo le taumafataga o le aoauli e pei ona tapena i ai lau afioga, le failautusi ma le paia o le tatou Ofisa, e momoli atu ai le agaga faafetai, ua maua sia faasiligamalosi e faaauau ai pea o tatou tiute ma le valaauina aua lava le Fonousu a Samoa.

Lau afioga e muamua ona momoli atu le agaga faafetai i le Taitaifono aemaise foi o le Komiti, ae le gata i lea o le tali faaaloalo foi a lo tatou Malo e tauala mai i le Minisita, i tulaga e pei ona taatia i lumamea ia fautuaga aemaise foi o tali a le Malo.

E puupuu lava se manatu o leni itumalo ona e i ai ni nai feeseeseaiga laititi lava i totonu o lipoti. O si mea lea e tau avatu pea faafesili po o le a le saoga tonu, aua faamaumauga a le tatou Maota fono. O le mea muamua, e pei o le tulaga lea o le Aperenitisi, e aumai ai le faaupuga lea, o le totogina o pili o le polokalame, e limasefulu e totogi lea e le MCIL, po o le Matagaluega o Alamanuia ma Leipa. O lea e aumai i le tali a le Malo, e tolusefulu e totogi e le falefaigaluega, ae luasefulu e totogi e le tama po o le teine lea e tauaveina le polokalame. O si faafesili ona o lea ou te faitau i le lipoti a le Komiti, e eseese foi pasene lea e aumai ai. Po o le a le vaega sao, o lena e i le itulau sefulu o le lipoti a le Komiti i le pito lava i lalo, o lena e foliga mai e tai fifty, fifty le tagata faigaluega ma le Ofisa faigaluega, e tai luasefulu lima pasene. Ae pei na o sina vaega

e pei na ona fia faamautinoa po o le a tonu le vaega sao, pe o lea ua tatou alu i le mea lea ua tali mai le Malo e tolusefulu le falefaigaluega, po o le employer ae luasefulu le employee po o le tagata lea faigaluega. Na o nai vaega laiti ia, aemaise foi la i le tulaga lea, e faafesili atu ai i le lipoti ona... i le vaega lea, i le itulau sefulu i le lipoti a le komiti, o lena e aumai ai le Aperenitisi e pei e valu lava polokalame na e faataatitia i ina. O lea foi la na saunoa nisi o sui usufono, e manaia ae talatala toe faatupulaia nisi o polokalame tauave mo alo ma fanau o lo o tauaveina tulaga ia faa-Aperenitisi. Ae pei o lena e aumai i i i tali a lo tatou Malo, e fitu polokalame ia lautogia. O lau la vaai atu i ai, e pei e tasi lava le polokalame lea e aumai i le lipoti a le Komiti, e le o aumaia i le tali a le Malo, e pei o le vaega lea faa-electronics, le vaega lea e aafia ai le afaileitio ma televise, pe o i ai se mafuaaga po o le tulaga e pei ua faataatia pe ua absorb i lalo o se isi polokalame, e pei na o le fitu lea ua agai mai. O le agaga foi lea ona o faamaumauga ina ia sao le tulaga, po o le tali lea a le Malo lea ua i ai le faasaoga ua i ai le tulaga e pei ona i ai le lipoti a le Komiti. E na o le pau lea o tulaga i faamaumauga. A o se manatu o lena itumalo ona o le tulaga i alo ma fanau o lea ua... o le transition lea mai le kolisi agai mai i le Iunivesite. O le vaiaso ua tuanai i le Aso Toonai, sa fai ai ni nai sikolasipi o si o matou itumalo. Ua avea foi lea tulaga o nisi foi o tausaga ua tea, e toatele lava matua e agai mai i se fesoasoani i pili o aoga Iunivesite a le fanau, aemaise lava le tausaga lea o le Foundation po o le UPY alo ma fanau aoga. Ua avea le tulaga sa taumafai ai foi se fesoasoani, aemaise o le tilotilo i maka o alo ma fanau. Aua ou te vaai atu i latou mataupu tauave, o lo o ave uma lava le full program foi lele, tai lima i le Semester. Ae i ai lava fautaugta na fai i matua, ona o le tulaga ua ausia le luaselau o maka faatapulaa, ae i ai nai mataupu ta te vaai atu pe tasi, lua le mataupu, ae i ai lava le mataupu e maualuga lava le pasi, lea e pei e tosoa atoa i luga le maka pasi a le tamaititi. Ae o le tulaga foi lele... pei o se faafesili po o se faafautuaga foi, pe i ai ni nai options e mafai ai ona repeat se tamaititi na te avea le UPY, i le tulaga lea e pei o tamaiti ia e ave le SC. A le pasi toe taumafai i le isi tausaga ina ia pasi lava. Aua e i ai lava le tamaititi e naunau lava, ia toe aafia i luga, uma le Year 12, alu i le Year 13, faasau foi le ai le UPY. Ou te iloa o lea foi e tatala tulaga ia i le SC faapea foi le SSLC po o le vaega lea i le Year 13. A o le UPY e i ai isi tulaga i sau matamata i maka o tamaiti, a ave mataupu ia e lima, ae ta te vaai atu foi i maka o le Year 13, e struggle le tamaititi e taumafai le full program lea. A totogi uma mataupu ia pe lima, e mautinoa lava tailo i ai, i finagalo o le Atua ma se fesoasoani, ou te iloa lava o le tele o isi mataupu ia is almost e le possible foi lele i le fulltime o le tamaititi e tauave uma. Ae pe mafai... ona o le agaga foi lele, o le a totogi uma lava mataupu e lima. Ae i ai le tulaga mautinoa, e le iloa pe lua pe tolu e le pasi, aua ta te fua lava i maka o tamaiti mai le SC oo mai i le SSLC. Ae pei se tulaga e mafai ona ave faapart time, fai muamua isi mataupu, e faaosofia foi le agaga o le

tamaititi pe a faapea o la ua lava le taimi e concentrate ai i ni nai mataupu. Instead o mataupu aua e fuafua lava i le malosi ma le silafia o alo ma fanau i le latou tomai ma tulaga faapena.

E pei o le uiga o se fautuaga pe mafai ona tatou tapenaina ni nai options faapena i tamaiti ia, aua e tatau foi ona i ai se tatou fautuaga i ai. Aua o lea ua fai nei sikolasipi a le itumalo, ae i ai le agaga maualuga e oo foi i le isi tausaga toe omai foi, o lona uiga e toe totogi foi mataupu o lea lava e iloa ailoga e pasi. E pei la e autilotilo i le tulaga lea, pe mafai ona faa-option faapena e mafai ona repeat ia mea ia, ae ia taumafai ia concentrate le tamaititi i mataupu e mautinoa e pasi. A o mataupu e vaivai ai, faalaiti laia ae toe ave i le isi tausaga, ia tele taimi e alu ai, ia matua study le mataupu lea, ona faamalieina foi lea o le seleni o lea e totogi. Instead o le totogi i le la tausaga fail, toe sau toe ave i lenei tausaga, ae pei o nai mea e tau fesoasoani ai foi i nai matua, aua le tulaga o tupe e faasoaso i le totogiina o pili o alo ma fanau.

O nai fautuaga na sa talatalanoa ai i matua i ia tulaga, ona o le faigata foi lele, ona o matua, a fai atu lava le tamaititi e ave uma mataupu, e pau lava le mea a latou o le sue o le tupe e totogi. Ae o lo o ave pea i ai le tuualalo, ma faamalosiau i matua, ia taumafai lava e faamalosi i alo ma fanau, finau ma toe sailiili ma tulaga uma faapena, e vaavaalua lea ma le latou fesoasoani. Aua o le toatele foi o alo ma fanau mai i lo matou itumalo, e au mai loa i le Iunivesite, ona sue loa lea o le tauaiga i Apia e nonofo ai, O le transition lea e faigata lava, e pei sa tau feololo o nonofo ma matua, ae sau loa i inei, e i ai foi lava ia aafiaga e ono aafia ai. Ua taumulimuli i taaga ua ese foi lava le environment ua ola ai. Ua i ai foi nisi o faafitauli, fai mai matua ua tele ina omai nonofo foi ma tauaiga, e pei o le tamaititi lea e tele ina faia feau ae le faia se meaaoga, e pei o nai vaega uma na, a fesoasoani la i ai nai options ia mo alo ma fanau foi ia, e mafai ona ave na o se vaega, ae toe tau taumafai e repeat isi mataupu e toe ave... not really repeat ae ave nisi mataupu ia pe ave muamua le tolu, ae sei ave le lua i le isi tausaga, e faapena foi le second semester. Ou te le mailoa i ai, ou te iloa o se tulaga e faafaigata ae pei e taumafai lava ia accommodate ia need o nai isi tamaiti aua e le tutusa uma alo ma fanau o si o tatou atunuu. Aemaise foi e pei o se vaega lea se avenue lea ta te fesoasoani ai foi, i matua ia e tausaili pili, aua e mautinoa lava e le pasi uma mataupu ia e fai, ae o la lava e totogi leaga e tatau ona totogi, leaga o la na fai mai, e compulsory e tatau lava ona ave atoa le lima lea po o le ono.

Lau Afioga i le Fofoga Fetalai o nai vaega laiti ia, e avatu ai se fesoasoani a lenei itumalo ma le faaaloalo lava.

FOFOGA FETALAI: Ia malo faafetai saunoa i le sui mamalu. Se i tulai mai le Taitai o le Itu Agai.

Tofa Hon LAUOFO FONOTOE NUA FESILI PIERRE LAUOFO:

E faafetai i lau afioga mo le avanoa, i le faaauauina foi o le tatou galuega i lenei aoauli. E faamauina le faafetai i le afioga i le Minisita ma le Komiti ma le latou lipoti e faapea foi le pule o le tatou Iunivesite ma le latou pulega ma le council. O lenei foi lipoti maeaea malo faafetai. O tulaga lea ou te matauina i mea o MOUs, Memorandum Of Understandings, e faafetai ua tele isi Iunivesite e le gata i le Pasefika a o isi Iunivesite i isi faaitulagi ua mafai ona sainia le tatou feagaiga e galulue felagolagomai, ma galulue faatasi. Ae o le fautuaga, se i silasila ane, e manaia pe a i ai se tatou MOU ma le Marine time Institute, ina ia tatou faipaaga ai faatasi ma tatou aoga lea o seila lea e i i Mulinuu. O lo o tele lava Marine Maritime Institute i le lalolagi, aemaise ai foi le tatou faaitulaga o Ausetalia ma Niu Sila, ona o lea ou te matau atu e le o i ai se tatou MOU ma se Marine Maritime Institute. O le taua o le vaega lea e pei ona ou tulituliloa i le tele foi o isi tatou Fonotaga. Ona o tamaiti lea e iu mai i i, o lo o maua galuega i fafo, o lo o maua galuega i fafo e le gata i vaa lau pusaoloa, ae faapea foi meli laupasese, o lo o maua a latou galuega faaseila. O le taua lena i lau vaai, e i ai ma o le isi foi tulaga e pei ona ou matauina. E manaomia lava le galulue ma se Institute faapea i fafo, ina ia siitia ia le tulaga o mataupu o lo o aoaoina i le tatou Marine Maritime School.

O lea ou te vaai atu i le lipoti a le SSS, e le o toatele nisi, pe leai foi nisi o i ai i luga o le level mo ofisa. E toatele lava tatou i nai galuega lea i lalo o le deck, a o ni galuega la faa-ofisa i luga o le preach, o galuega na e tetele totogi. E lelei totogi, e pei o le mafuaaga foi lena o le fautuaga, ina ia siitia le tulaga o le tatou aoga lea ina ia talafeagai foi ma isi Institute ia Marine Maritime o lo o i fafo. O Institute Marine Maritime ia e tele i fafo e tele lava na o i latou, e le faapea o i totonu o se Iunivesite, e tumaoti lava latou. O nei foi Institute ua leva ona faavae, ua lauiloa foi i le lalolagi, o le tulaga lena e ala atu ai se fautuaga. O le tatou accreditation, faamaonia o tatou faailoga o lo o maua mai i le Iunivesite, ona o le lipoti o le 2019/2020, o lea ou te vaai atu e na o le 8 tatou faailoga sa maua le accreditation mai le tatou SQA i lena foi vaiata. Ae o le a se tala lata mai? Pei e tau iai se lagona ua tele atu isi tatou faailoga ua maea ona faamaonia le SQA ma e 4 ia faailoga na sa i ai i le vaiata lena e aofia ai ma le Masters Degree e tasi, ma le Master of Education. O la sa faatali se faaiuga a le SQA mo le faamaoniaina o faailoga tikeri na e 4. Po o le a se tala lata mai po o ua pasia ma faamaonia uma ia vaega na?

O le isi mataupu e fia afea i se tautalaga o le tatou TV a le NUS, o lea e pei e matauina e le lipoti o le Komiti a o faafofoga mai le Afioaga i le Taitaifono. O lea e i ai le fuafuaaga o le a faatau ese atu le TV a le NUS. E i ai lou talitonuga o se aseta taua lea o le Iunivesite aemaise a mo le agai atu i luma i le faasalalauina o aoaoga ma fesootaiga ma tamaiti aoga poo students a le Iunivesite. O lau a tatalo se i silasila pe iai a se auala e mafai ai ona taofi pea le tatou TV lea. O lea e aumai le Lipoti o le Komiti

e totogi le 25 afe i le masina i le Samoa Digital Communication Ltd Kamupani lena e totogi ai le 25 afe i le masina, mo le faaauauina o le tatou TV ae pe mafai ona silasila i nisi faiga foi lea pe fai faapaaga ma nisi kamupani ina ia iai se faiga foi lea faapisinisi e mafai ona faaavanoa ai se isi vaega o le se isi taimi o le tatou TV ina ia maua ai ni tupe fesoasoani i le tatou TV. Ae pei o le auga o le fautuaga ina ia taofia pea e le tatou NUS le tatou Iunivesite le TV lea ona e taua mo le agai i luma i polokalame o tamaiti aoga. E pei o le vaega lena lea mafua ai le fautuaga i lea tulaga. Tatou vocational poo matata eseese mo trades. O course ia matua manaomia lava a le tatou atunuu. E manomia tele aemaise lava atunuu tau atinae o kamuta, mo faimoli, mo mea o tulaga eseese faapena. E taua tele le uunaia pea o tatou courses ia. Aua o lea foi e matau e pei o i lea i ai le vaega lea tele ina o i fafo. O galuega ma maua o latou avanoa faigaluega i fafo lea foi sa iai le vaega lea kamuta, maua galuega i lalo o le polokalame a Niu Sila e pei a tai 3 tausaga lea e o e galulue ai, leilao pe maua ai ma ni nofomau le toe foi mai. A o le tulaga e pei ona agai atu ai se fautuaga ina ia uunaia pea malosi le tatou vaega lea ona e taua mo le atinaeina o le atunuu. Pei na o le pau ia o nai manatu lau Afioga i le Fofoga Fetalai e faamauina momoli atu le faafetai i lau Afioga i le Minisita faapea foi le Komiti ma le tatou Iunivesite.

FOFOGA FETALAI: Malo saunoa i lau Afioga i le Taitai o le Itu Agai , tulai mai le sui o Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEI'A: Faafetai i lau Afioga i le Fofoga Fetalai mo le avanoa i lenei foi Itumalo. E muamua ona momoli atu le faamalo i le Afioga i le Taitaifono ma le Komiti sa nafa ma le iloiloina o le Lipoti a le tatou Iunivesite. Momoli atu foi le faamalo i le Afioga i le Minisita faapea foi le Ofisa Sili o Pulega ma le Pulega a le tatou Iunivesite o feagai ai ma le galuega fita. E puupuu nai fautuaga e tuuina atu. E matauina e lenei Itumalo o le faafitauli a lea e masani ona tulai mai i le tatou Iunivesite o pili o tamaiti aoga, e fa'i foi o le tatou naunau e provide le aoaoga mo alo ma fanau a le atunuu ae o se faafitauli tele tele ma tuga o lo o feagai pea ma le pulega a le Iunivesite le tau aoina o pili o. O se faatupu manatu o lenei Itumalo pe mafai ona silasila le tatou Malo i se fesoasoani mo pili o tamaiti aoga aua lea foi pei ona maua i saunoaga a nisi o sui o lenei maota o lea tele na agai mai ia le mamalu o le atunuu i sui usufono ae le lava foi se tamaoiga o sui usufono e tali atu ai i manaoga o le atunuu. Ae pe le alagataua ona silasila le malo o lea ou te vaai atu i faamaumauga, o le tupe e operate ai le tatou Iunivesite i le tausaga pe 25 miliona ae o le 40% o lena 25 miliona o lea aumai e le grant a le Malo e fesoasoani e totogi ai ia faiaoga. A lea foi e maua atu i faamaumauga e 140% pasene pe a e faaalu i le totogiina o faiaoga le fesoasoani lea a le Malo. A o se tuualalo a lenei Itumalo pe mafai ona

vaai le malo i se faiga e mafai ai ona tuu atu ni nonogatupe i tamaiti aoga, ma le faamoemoe a oo ina uma a latou aoga ma omai e faigaluega ona toe togitogi malie mai lea o tupe a le tatou Malo. Nai lo le tuu atu saunoa fesoasoani a le Malo e faatupe ai le Iunivesite e aunoa ma se agaga e toe foi mai lena tupe ae afai se polokalame lelei e faatupe ai aoga a tamaiti aoga, ma le faamoemoe lea a iu manuia latou aoaoga ia omai e faigaluega i le Malo ma togitogi. E le gata ina togitogi malie a ia laititi foi se pasene poo se tului o nonogatupe e mafai ona fesoasoani atu ai lo tatou Malo.

O le vaega lona lua o se fautuaga, e vaavaai a male alofa i le tulaga o iai ia Kolisi faaitumalo. O le toatele a o taimaiti aoga i le Kolisi faaitumalo e uma loa le aoga i le Kolisi faaitumalo fai maumaga loa, ae toa laiti a nai tamaiti e ausia le tulaga e faaauaua ai le aoaoina i le Iunivesite poo le matata eseese foi. Ae se i tau vaavaai poo a nisi e ui e le aafia i i le lipoti a le Iunivesite ae sei tau silasila le Malo pe le agavaa ona faaofi nai nisi o aoaoga mea tau faatoaga ii Kolisi faaitumalo a ua uma ai a la le aoga o le tamaititi ii ao la e maua nai tomai na e mafai ona faaoga i tua i le atinaeina o faatoaga .O le isi vaega e fia agai iai se fautuaga a lenei foi itumalo na saunoa nisi o sui e toe tuu eseese le Matata eseese ma le Iunivesite ae iai itu lelei sa mafua ai ona tuu faatasi lea Matata Eseese ma le Iunivesite aua o le isi tamaititi e tau loa o lae aoga o le Iunivesite pei ua faaosofia ai le fiafia e alu i le aoga ma pei foi o iai o le isi tamaititi o lae aoga i le Iunivesite pei o itu lelei ia sa vaavaai ae o le matau i le faagasolo o nei mea .

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Malie le sui tulai mai le Afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: Faafetai mo le avanoa nei mamao ese le saunoaga o le sui mai le mataupu taua lea sa ia taua e ala i le fesoasoani lea i pili aoga o tamaiti. Na ona ou faamanatu atu lava o se tasi lenei o faiga faavae o loo faataatia i lalo o le anavatau a le Faatuatua i le Atua Samoa ua Tasi, le mea tonu a lea e te saunoa iai o le Students Loan ma e masalo o se taimi na oo lea iai o le vailiiliga a le Matagaluega ma faatino ai le tulaga tonu a lea e te saunoa i ai. O le fesoasoani i tamaiti aoga lava ia e mafai ona fai ni nonogatupe i tulaga talafegai ona faigaluega lea o ia ma togitogi ao le itu lea ua amata atu ai le fesoasoani lea ua tatou iai o le tatou miliona tala lea ua e silasila mai ia au ia ou te tautala pea au i lou itumalo. E faavagavaga le matou \$,000 e fai ai le matou scholarship fund a la ua faasolo ua matou aumai uma lava ia igoa o alo ma fanau a lou itumalo lae aooga i le taimi lenei ia i latou e tausaga muamua, e tau i le tausaga faaii aumai uma a latou igoa ma fai ai le faaiuga fesoasoani ave sao a lea o le siaki i uta i le NUS. Ma

e avatu ai foi le fautuaga a le tatou maota o le fesoasoani muamua lea e tali atu ai le tatou poloketi o le \$1 miliona fesoasoani i le scholarship funding. Ae pule outou, a o au ia ma lou itumalo ua ave le faamuamua i le Iunivesite ona o le Iunivesite o le taunuuga lea o le mataupu e tatai ona tatou tilotilo o tamaiti o le a iu mai, a o le Kolisi, Primary, Secondary, Early Child o la e fund uma i lalo o le tatou funding a le tatou Malo. O se fesoasoani atu lea ma le faamanatu i le sui, ae taua lou finagalo ina ia maua pea avanoa e fesoasoani ai i tamaiti aoga ma lou agaga faaloalo.

FOFOGA FETALAI: Malo saunoa i lau Afioga i le Minisita sei tulai mai le sui faaauau le saunoaga.

Afioga LUPEMATASILA GALUMALEMANA TOLOGATA TOGIA TILE LEI'A: momoli atu le agaga faafetai i le Afioga i le Minisita ma le Malo pe afai o le vaega lea ua agai ai taumafaiga foi o le tatou Malo e pei ona tulai mai. O le vaega lea sa taumafai atu ai se manatu o le tatou Iunivesite ma le Politech. O tulaga masani a i soo se Iunivesite, e iai a le avanoa e tuu i tamaiti e malolosi e o sao ai lava i le Iunivesite, ae le faagaloina ai foi le avanoa e tuu i le tamaititi e taumafai atili. Ua ona le ausia ia maka e au ai ile Iunivesite e fai a sau tala faataitai o le profession lea o le engineering. E i ai lava tamaiti malolosi e uma loa le vasega 13, ae le faia le tatou Iunivesite i aso la e alu sao a le Iunivesite e fai lana Bachelor of Engineering. A o tamaiti la e le ausia maka na e pei e ui atu la i i le Politech. O le tulaga e fia faamalamalam atili leaga e o le tatou atunuu a tau loa le upu inisinia pau a le mea e oo mai le mafaufau o le fai taavale ae eseese mo le mea professional engineering. E le o se fai taavale ae mo le motor mechanic e pei o fai taavale ia, a o le uiga o lau faamatalaga i le tuu avanoa pea i manaoga eseese o le fanau e matauina. I aso la o Niu Sila sa iai la latou polokalame e tau o le NZCE, e go through tamaiti ia e le ausia maka e o sao ai i le Iunivesite o se polokalame e ese le manaia e more hands on more practical le polokalame lea le NZCE. E i ai foi la ma le avanoa a maea le NZCE ona agai atu lea o tamaiti ia e fai le professional engineering poo le Bachelor of Engineering o le mea manaia e matauina i tamaiti ia e uma mai le Bachelor of Engineering e sau e faigaluega ua matua lelei a le potu masani ma hands on i le galuega, aua foi o lea sa through i le process lea ma e matauina le tulaga lelei lena. Aepeitai o le tamaititi lea na alu sao o le tamaititi malosi a sau a e faigaluega e le tutusa ma le tamaititi lea na amatamata atu i lalo. O le mea lea e le faapea e tatou te ave le credit atoa i i i tamaiti simati ma popoto ae taua foi latou o loo taumafai pea ina ia taunuu lava i le sini lea o le ola aoina. O le mea lea foi afai o le suesuega lea e i ai nei e tatai ona toe tuvaevae mea ia e 2, ina ia address ai issues ia e tulai mai e lagolagoina foi e lenei itumalo ae afai e leai afai e le mafai ona address ai le issues lea. O le a le mea o le a tatou o ai e toe alo lena ogasami na tatou omai ai. Ae pei o lau lena matau i le faasologa

o Iunivesite i fafo, e pei ua salamo le tele o atunuu tetele i le faiga lea o le tuufaatasi o Polytec ma le Iunivesite. A o lea foi e taumulimuli atu ai tatou, e le faitio foi leaga o tatou te tulimatai po o a mea la e tutupu i le lalolagi tele, ma tatou aoao mai ai foi. A o lea ua tatou tilotilo atu, e leai e i ai foi mea e le lelei atoatoa ai le tuufaatasi o le Iunivesite ma le Matata eseese. E pei o se fesoasoani lea ma se manatu o lenei itumalo. Ae momoli atu le agaga faafetai tele i le afioga i le Minisita ma le Pulega i le taumafaiga o le tatou Iunivesite. Ia manuia le tatou Fono.

FOFOGA FETALAI: Ia malo saunao. Tulai mai le sui usufono mo Vaimauga 1.

Afioga SULAMANAIA FETAIAI TAUILILI TUIVASA: Faafetai mo le avanoa lau afioga i le Fofoga Fetalai, e laititi lava le manatu o lenei itumalo, ona o le faatauaina o le lipoti a le Matagaluega po o le Faalapotopotoga foi aemaise o le Iunivesite aoao a lo tatou Malo. O lea ua tatou talanoaina le 2019/2020 ma le 2020/2021, a o le agaga faafetai o lea foi ua opea i le Maota le lipoti faaletausaga faaiuina i le 30 Iuni 2022, o le agaga faafetai lena o lenei itumalo i tulaga o lo o faatino ai le tatou Iunivesite. O le agaga faafetai o lenei itumalo i le afioga i le Minisita, aemaise o le Faa-ao aemaise foi o le Ofisa Sili o Pulega, i le tulaga foi o le faagaoioiga o le Iunivesite Aoao, e momoli le agaga faafetai, i le tele o galuega lelei o lo o faatinoina. A o lenei itumalo e alu sao lava i le lipoti a le Komiti. E faafetai i le Taitaifono o le Komiti o le Vaega Tau i le Va fealoai ua tuuina mai, o le fausiaina lea o se fale, aua se tulaga i le falemai. E avatu lava le tuualalo, ona o lea o le a toe fai le isi fale i Papailegalagala, o eleele o Vaimauga, ae a pe a fai i i, i Motootua. O le agaga o lenei itumalo lau afioga i le Taitaifono ma le Minisita, ina ia mafai ona faafaigofie. Ia mafai ona o atu tamaiti i le aoga faafomai ma tausii soifua ma i latou uma na, ma o ifo i totonu o le falemai. Ae a ave i o i Motootua le fale lea o le a fai ai. E pei e faapena, i atunuu foi i fafo lea e fai ma faasolosolo ai tatou, e fesagai lava le mea e i ai le School of Medicine ma le falemai. Ia agai atu i ai alo ma fanau ia faapena ona fai ma koloni ai ma vaai po o a foi tulaga o lo o i ai. O le fautuaga lona lua, e lagolagoina e lenei itumalo, ona o lea ua i ai pasene e totogi i le 50, 30 ma le 20 e totogi. E lagolagoina foi pasene ua tuuina e totogi a e alo ma matua ma latou foi fanau le tulaga. Ae o le tatalo pe faafefea la nai fanau ia e le o mafai ona o e faigaluega. Aua o lea e pei e maua o pototo masani ia e pei o le palama, inisinia, o tulaga faapena uma, o latou o lea e o e faigaluega. A o nisi, o lea foi e maua i lauga a nisi, e ese le tulaga e o ai i gauta le fanau. E uma loa le first year ia o loa i fafo, ae faaaauu lava nisi i tulaga ia, e fai lava i gauta le degree. O le agaga la o lenei sui usufono, pe le o i ai nai faamanuiaga mo alo ma fanau ia e le o faigaluega. O lea e uma mai loa le aoga i le Form Five po o le Form Six, ia o atu loa i gauta o loa e ave le inisinia o masini, o le palama o le lipea

o pusa aisa ma mea uma faapena, ina ia ave ai sina sikolasipi e faaauau ai.

O le tulaga mulimuli e lagolagoina foi le galulue faatasi o le Iunivesite ma le SQA, e faafetai ai foi i le SQA, o le tele lava o taimi sa matou i ai foi i totonu o le Komiti lea i Paeaiga ua tuanai, e pei lava tau i ai nai tulaga faapena. Ae o le tatalo o lea ua e tulai mai lau afioga i le Minisita, ua leva foi ona e galue i totonu o le Matagaluega, ia galulue faatasi lau Iunivesite ma le SQA, ina ia mafai ona faapena ona afifio atu foi i fafo alo ma fanau ae o lo o maua nai faamanuiaga. O le isi o vaega o nai faiaoga, sei silasila ane foi, aua e pei e ese lava faiaoga lea e aoga i tulaga ma faiaoga i Kolisi ma tulaga faapena, a o e o lo o faiaoga i le Iunivesite o Samoa, pe le mafai ona maua nai faamanuiaga ona o latou nei ua maualuluga foi tulaga o faailoga o lo o i ai, ae tatalo atu i lau afioga i le Minisita, ia se i toe silasila ane. O lenei itumalo ia, o se atunuu e atamamai alo ma fanau, o se atunuu manuia lena mo le agai i luma. O a uma foi tulaga e tagi mai ai tulaga i aoaoga ma lau Matagaluega aemasie o le Iunivesite Aoao, e lagolagoina lava e lenei itumalo, ona o le lumanai lena o le tatou atunuu.

O lenei itula lau afioga i le Fofoga Fetalai, e pau lena o manatu o lenei itumalo. Ae faamanuia le Atua i le tulai mai o le afioga i le Ofisa Sili o Pulega o le Iunivesite, ia o ou mama na. E faapena foi i le tulaga o lenei lipoti sa i ai foi le afioga ia Aiono, e momoli atu le agaga faafetai, o lea ua i lumamea le Maota lenei le tulaga sa i ai, ia e lagolagoina lava e lenei itumalo le lipoti matagofie a le Taitaifono aemaise o le Minisita o le Va Fealoai. Ia manuia le Fono.

FOFOGA FETALAI: Malo saunoa i le sui usufono mamalu. O le avanoa lenei i lau afioga i le Taitaifono e tulai mai e tali i nisi o mataupu sa laga e sui mamalu.

Afioga LAUMATIAMANU RINGO M. PURCELL: E momoli le agaga faafetai i sui usufono mamalu uma sa sausaunoa, fetalai foi e tusa o le lipoti a le Komiti. E faalogologo lava foi ma le totoa i le tele o fautuaga ma timaiga aua lava le tatou Iunivesitel. O nisi foi o mataupu e le o i totonu o le lipoti, ae o lea lava ua oo i ai le faatofalaiga foi a sui usufono, o le naunau lava ia lelei le aoaoina o fanau. E masalo o le tele lava o fautuaga e agai i le Minisita, i tulaga o le Polytechnic ma le toe tuufaatasia ma le tuueseese, ou te iloa e maua le avanoa e tali atu ai le afioga i le Minisita i se taimi. E pei lava ona atagia i le lipoti o le 2019/2020 o lo o faamanino atu ai, e 8 lava courses o lo o faapena ona aoaoina ai fanau. Ou te masalo e le i sau le lipoti o le 2021/2022, e faapena ona silasila foi i ai lo tatou Maota, i nisi foi o courses ua faapena ona faaopopo e aoaoina ai fanau.

O le faafesili a le afioga i le sui usufono mo Aleipata Itupa i Luga, ia e sao lau afioga. E 50% le Malo, 30% le employer ae luasefulu pasene le tamaititi aoga. O le mistype o lo o i ai i le lipoti a le Komiti.

O le tulaga i le fautuaga i le UPY i le fetuunaiga o togi ae faapea foi le SLC ma le SSLC agai i le UPY i le repeat ia e optional, i lau saunoaga. O le a lafo atu i le Minisita mo lea vaega. E pei ona faamauina foi i le saunoaga a le Taitai o le Itu Agai, se MOU e sainia ma se tatou paaga i fafo, masalo o le a saunoa i ai le Minisita. A o le tulaga i le amata ona aoaoina o alii vaa i tofiga faaofisa, o le taimi nei ua amatalia ia aoaoga mai lava i le la tausaga, amata ona aoaoina a tatou fanau. Ou te iloa leaga o le lipoti lenei o le 2019, ae ou te iloa e sau le isi lipoti ua faailoa mai foi e le tatou Iunivesite ia le tulaga lea ua aoaoina ai ia alii vaa, i tulaga faaofisa.

O le tulaga i le tatou TV, e faitau eseese Ape ma Tutuila, ae o le lipoti lena e alu atu, e faatatauina, o le a run faa-commercialize le tatou tv. O le faatauina mai, advertise, tatou advertisement mai faalapopotoga ma kamupani e faapena ona maua se tupe, e faapena ona run ai le tatou TV, ae leai se manatu faapena o le a faatau ese le tatou TV, ua matauina le tele o le aoga o le tatou TV i le Iunivesite. I le taimi o le Koviti-19 ma faamai sa faapena ona le mafai ai ona faataunuina ia aoaoga sa masani ai.

E pei foi ona taua tatou pili aoga, o lena ua faamanino e le Afioga i le Minisita o Faatoaga, ia tulaga foi o aoga o lea ua lilifa lava, e oo lava i lo matou itumalo, o lea ua faaluina foi se seleni e fesoasoani ai i fanau aoga, aemaise lava o le Iunivesite. Ou te iloa ua tele lea fesoasoani mo lenei taimi. Ae pei ona saunoa le Minisita o Faatoaga, o se taimi o i luma, o le a faamanino isi fuafuaga a le Malo e ala i loan a le fanau aoga. A o lea ua amatamea i le tatou miliona, e aofia atua i foi si o matou itumalo.

E pei foi ona saunoa le sui usufono o Vaimauga 1, e moni o le SQA o lo o i lalo o le MESC e faapena lava ona galulue faatasi i le tauasaina o le accredit ina o tatou polokalame, ina ia siitia ma tumatie aoaoga o lo o faapena ona aoaoina ai a tatou fanau. E masalo e na o le pau lea o vaega sa lagalaga, ae o le tele lava o mataupu, o lo o faafofoga mai le Minisita e tali atu ai i fautuaga foi, a o mea e le oo ia i le malosi o le Komiti, e faamauina finagalo ua faaalua. E momoli foi le faafetai i sui usufono, sa faaalua o latou finagalo e tusa ai ma le lipoti a le Komiti. A o se avanoa lelei foi e faafetai ai le afioga i le Laau na Fausia, i latou foi sa galulue i lea vaiata, e faafeiloai foi le Ofisa Sili o Pulega ua i ai o le tatou Iunivesite. Ia alo ane i ou faiva manaia, e i ai le talitonuga o le a maua nisi manatu foi, idea fou, e faapena ona faufau ai le tatou Iunivesite. Ma le faaaloalo lava faafetai i lau afioga.

FOFOGA FETALAI: Ia faafetai i lau afioga i le Taitaifono. Tulai mai lau afioga i le Minsita o le tatou Iunivesite e saunoa i nisi o mataupu sa laga e sui usufono mamalu o le Maota.

Tofa Hon SEUULA IOANE: E faafetai lau afioga i le Fofoga Fetalai mo le avanoa. E muamua foi ona momoli atu le agaga faamalo ma le faafetai i sui usufono sa latou faatauaina lenei foi vaega o le tatou Malo o le tatou Iunivesite, aemaise foi o tatou aoaoga. E i ai foi le talitonuga o le fatu lea o le Malo, a faapea e manuia alo ma fanau, o lo o aoaoina, o se faamanuiaga foi lea, ma avea o se faamama-avaega mo le tatou atunuu.

I lau faalogologo e foliga e tolu ia fautuaga, o le fautuaga i le Komiti, o le fautuaga i le Ofisa o Aoga po o le Minisita, ma le fautuaga i le Malo. O lona uiga e i ai nisi fautuaga e le mafai ona ou tali atua, pe a faapea e fautua i le Malo. Ia o le a ou fesoasoani atu.

E muamua afea e le sui usufono o Faasaleleaga 5 le Aperenitisi. Ua leva ona ma faasoa ma Peseta i le mea lea. Ona o Peseta e i ai lana kamupani e omai i ai tamaiti ia e o e faalava ai lo latou tomai. Ina ua uma ona aooga tamaiti ia i le theory, ona tataua lea ona i ai se kamupani po o ni kamupani e ave i ai e fai ai le latou practical. O lona uiga o le assume lea e mafaufau i ai le aualii lea e i ai kamupani ia, e omai tamaiti ua selau pasene le atoa. E na ona omai lava faasino, fai le mea lea, fai le mea lea but o le manatu faaaoaoga, o i lea e faaopoopo ai le tomai faa-practical. O lona uiga e omai tamaiti e feololo le mafaufau ae le lava le gaoioi. O i latou la ia, e sapalaia mai le fesoasoani e faatumu ai le avanoa lea, e faaleleia ai tamaiti aoga ia a tatou. Aepeitai e ese foi le latou tilotilo, e faapea e tataua ona omai fao loa i le afi ma ola loa le taavale.

Ae e i ai le talitonuga o le tilotilo lena a le Matagaluega latou, e ala ai ona faasoa atu i tua i Matagaluega, e aumai lo latou tauau i le itu lea. O le standard, sa afea foi i le saunoaga a Peseta le mea lea tau standard, e eseese standards. O le a avea ai foi le mea lea na pisa ai Tutuila ma tatou, e pei e foliga le malilie ai. O lau malaga na ou alu i Kanata, na ou alu ma le mea e palaka ai lau telefoni, lea e sulu e fafaga ai lau telefoni. Ou te tago atu i le mea e sulu ai, e eseese mamao le faatulagaga o pu o le mea i o i Kanata ese le mea lea ou te alu atu ma au, e eseese standard. E tutusa o la e i ai le power, o la e i ai le manaoga e ola ai, ae eseese standard. O lona uiga e le o faapea o le valea pe a, e leai e le o le mea lena. E tutusa lelei, but e eseese faiga e mafua ai. O lona uiga la, a faapea la e fai mai se isi atunuu e le tutusa a tatou standard, e leai se mea o le a tatou faitai ai fua, e leaga o le standard le e aooga ai tamaiti ia, i le vaega lea, o le standard a le lalolagi atoa. O lea foi la e tau faapiipii ai tatou. Na fesoasoani mai Leaana, o Leaana o se isi tagata o le sui lea sa faiaoga muamua i le Polytec. E alu ese lava la mai le Polytec o lo o i ai lona mafaufau faa-Polytec e faapea e le tataua ona i lalo o le Iunivesite. I aso la a o i ai le Polytec, o lou talitonuga e te usu atu loa i le taeao, a faapea o oe o le kamuta, e te usu atu loa, ili loa laupapa, fao, samala. E ta lava le tasi, e na o le ili lava, laupapa, fao, samala. O le tele ia o le taimi e aoao ai, e te sau la i tua, e 100% inisinia, palama po o le a le mea. I le taimi lea ua i lalo o le Iunivesite, e le mafai ona e alu i totonu o le

Iunivesite, e te alu atu e na o sau palama e ave. E tatau ona i ai nisi au mataupu e enrol ai oe i totonu, o lona uiga ua tau utiuti laititi le taimi but ua tele le experience tele le aoaoga e faigofie ai nai mea faapena.

Afioga Hon Valasi Luapitofanua Togamaga Tafito Selesele: Lau afioga i le Fofoga Fetalai, mo le faasaoina o le taimi o le Minisita.

FOFOGA FETALAI: Malie lau afioga i le Minisita, tulai mai lau afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: O le faafesili i lau afioga i le Fofoga Fetalai, ona ua alu le suesuega a le Minisita e suesue tali a nisi o sui usufono. Ae o lea e le o nonofo mai i le fonu, pe ua faanoi lau afioga. Ma le isi mea, ana o a'u ou te le talia pe afai e le o saofai mai i i. Ae ua alu le taimi ma le mafaufau o le manaia ia o le flow o le faamalamalamaga a le Minisita. O lea la lau afioga i le Minisita, aua e te tali pe a le nofo mai i.

FOFOGA FETALAI: Ia saunoa lau afioga i le Minisita.

Afioga Hon SEUULA IOANE: Ia faafetai i lau afioga i le Fofoga Fetalai, faafetai i lau afioga i le Minisita. Ae manatua e i ai foi le upu foi lele a Samoa, e fai taliga o aupa, o la lava e faalogologo mai le nofoa, a le sau lava, faalogologo mai le nofoa, atonu lava e tali lava i ai le nofoa i se taimi, ae faafetai lava mo le fesoasoani mai.

Na saunoa foi le sui usufono mo Salega, i le itu lea o le le lava o le taimi. E manatua foi, o le University its just an umbrella, i se faamalu, a o totonu, e i ai le faainisinia e i ai lea, i ai lea, o lona uiga ina ua ta aofai ua ono utiuti ai taimi e faaoga e aoaoina ai tamaiti. Ua le pei o aso ia, e pei ona ou fai atu i le amataga. A faapea o le marine maritime, e na o le pau lava lena o le mea e aoga ai, ae ese le manaia o fautuaga. E manaia tele foi, o lea ua tatou tilotilo atu i lenei vaitau i le agai i luma o le Industry a le tatou atunuu ma le Malo, o tamaiti e ave faaseila, e tele foi le avanoa e mafai ona aveese latou. Ae o nei mea e le faia i se po se tasi. E faafetai mo fautuaga ua tuuina mai, ua faamauina ma faataatitia e fai i ai le fuafuaga i le Pulega a le Iunivesite. E i ai nisi o saunoaga e pei o le sui usufono mo Aleipata i Luga, sa faataatia mai ai polokalame foi ia. O lea e matauina lau Afioga e 7 lava tatou polokalame lea e fai, peitai o lea ua online po o lea ua amata ona faagaoioi le isi tatou polokalame lea, e faa-8 ai polokalame o lo o i ai nei. O le fuafuaga foi lena e pei ona saunoa i ai lau afioga.

O le vaega lea sa saunoa i ai pe tatau ona repeat ia nai tamaiti lea e le pasi ma le au o latou maka i le tulaga e tatau ona faauuina ai. O lea lava e mafai ona fai i le Iunivesite i le taimi lenei, i luga o aiaiga lelei ma feutagaiga lelei a le Management ma tamaiti aoga po o matua foi.

Sa aafia foi pili a le tatou Iunivesite ma faapea o se faafitauli ogaoga lea mea, but e mafai foi ona tatou tepa o le University, o le Iunivesite, e le o se... its not a small company e mafai foi lea e ono fetuunai ai. O lea ua tatou iloa lava o le University level e maualuga. E i ai foi le talitonuga e taugata, e faigata, ae a iu mai ma lona pasi e tatau ona iu mai ma se pasi lelei, e fua foi i le taugata o le olaga ma le taimi na aoga ai. O nai vaega na sa fesoasoani mai, e tele nisi polokalame o lo o faataatia e le tatou Iunivesite e mafai ona fesoasoani, e i ai ia fuafuaga e agai lava i luma le faamoemoe o le Iunivesite e le tumau i se mea se tasi.

O lo o vaavaai lava, ma fai paaga ma Iunivesite mai fafo. E le gata o Amerika, Niu Sila o Ausetalia, e mafai foi ona faaofi mai a latou polokalame ma soalaupule ma le tatou Iunivesite pe ono fetau mo Samoa pe leai foi. Afai e fetau, ia faafetai ma viia le Atua.

FOFOGA FETALAI: Malie lau afioga i le Minisita se i tuu atu le avanoa i le Minisita o Faatoaga...

Susuga Hon Laauli Leuatea Polataivao Fosi: E na ona fesoasoani atu lava, i le folasaga matagofie a le Minisita o Aoga. E na ona ou faamanatu atu lava, o lea sa taua e le Taitai o le Itu Agai ia le curriculum fou foi lea ua i gatai i le Marine Maritime Programme. O lea ua i ai le course lea ua tasi le tausaga mo Fishing Deck, e aoga tele mo nai tamaiti ia e tasi le tausaga, ae maua lo latou poto aoaoina i mea tau seila. O le taimi leni i le onosefulu ma ona tupu ia vaafagota le ae fagogota ia tatou, e leai ma se tamaititi Samoa o i luga o vaa ia. O la e tumu i Tuvalu, Vanuatu, Kiripati ma isi atunuu. Aisea? E le taitai lava lo tatou tomai, e agai ai tamaiti e ave le fishing deck lea ma nisi tulaga tau faiga faiva lava ia.

Ae o le agaga faafetai tele i le Iunivesite o le faalauteleina o le service lea, ua mafai ai ona ola aoaoina tatou tamaiti. E le i lalo ifo i le 200 avanoa faigaluega, ae leai ma se Samoa o i ai. O Kamupani foi ia e o tai 4, 5 masina o o, e na ona faapena atu, ona o lea sa taua e le Taitai o le Itu Agai le isi tulaga lelei lea ua tatou i ai. E leaga ua tau matele isi tamaiti ua fiafia e o e tietie i vaa meli, pe o i vaa lauolooa. Ae o vaa ia e omai ia tatou, e o lava ma toe omai ia tatou. E pei o le faamanatu atu lea, e avatu ai foi le faafogafogaaga a lo tatou atunuu, i alo ma fanau, e pei o le mea lava lea tatau ona lilifa i ai. E pei e tau loa le faatoaga, ma le faigafaiva, is the last option. Ae o le taimi leni, tatou te agai lava i mea lea e i o tatou lima ma le faatoaga ma le faiga faiva. Ae ua i ai la le poto aoaoina leni ua faaopopo e lo tatou Malo. O le fesoasoani atu lea ma le agaga faaaloalo.

FOFOGA FETALAI: Tulai mai lau afioga i le Minisita o Galuega, onosai mai lau afioga i le Minisita o Aoga.

Tofa Hon Olo Fiti Afoa Vaai: E faamalulu atu i le afioga i le Minisita, ona o lea ua talanoa tonu lava le mataupu lea, e sili atu le faatauaina foi e lenei itu, i le tulaga lava i seila ma poto faapitoa e galulue ai i luga o vaa. Ou te manatu o le vaega lea o aoga faaseila lea o lo o i lalo pea o le Iunivesite, ma e tele nai faafitauli o i ai. Ona o le tulaga e le o tele ni faiaoga. I le tulaga tonu lava lea ua fesiligia i le tulaga faaofisa, ua i ai le manatu e toe fetuunai lava, atonu e i ai foi se taimi ona tuuina atu lea i le Faigamalo, le toe aumaia lea o le aoga lea, ina ia maoti le tagofia ma tulaga o le faafoeina e le Pulega lea o le SSS, o le Samoa Shipping Corporation ma le PFL. O totonu o ia itutino o lo o i ai ia tagata faigaluega sa faiaoga foi, mo le toe taumafaiga o le tatou aoga lea. Ma ia faalautele atu le faaaogaina o le tatou aoga lea i o tatou uso i Tutuila, ia e faapena foi i le Pasefika. O lea ua faamauina tatou aseta i le taimi lenei, pau lava le mea lea e i ai, o le faaaogaina tatauina o le vaega lea. Ma faasolo ai loa tatou alo ma fanau i meli o vaa fagota ma tulaga uma e pei ona saunoa le Minisita o Faatoaga ina ia faigofie ai ia tulaga uma.

Ia e le gatia lau afioga i le Fofoga Fetalai, i le tele foi o a tatou tupe maua, a le tatou Malo i lea foi aoga, ma tulaga o le faafaigaluegaina o alo ma fanau. Ma le faaaloalo.

FOFOGA FETALAI: Malo faafetai. Se i tulai mai le sui usufono mo Safata 1.

Afioga LEANA RONNIE POSINI: Lau afioga i le Fofoga Fetalai, e faafetai ua maua se avanoa. E faafetai tele lava i lau afioga i le Minisita ma le saunoaga malamalama a lau afioga. E pau lava lea, e tasi ae foi atu lou finagalo, o lo o faapea o le mafaufau faa-Polytech, e leai ou te talitonu e le o faapena lou mafaufau. Ina ua ou ulufale mai i totonu o le Maota lea, i le tolusefulu tausaga o tautua mai tua, agai mai loa i totonu i i, ae sa i ai foi i totonu o le Iunivesite. O le ala lea e lautele le mea sa vaavaai i ai, ae le o se tulaga e faapumoo le vaai lea e te saunoa i ai. E leai sa i le Polytec sa i le Iunivesite, ona tilotilo lea ma matau, ae o lea ua maua le avanoa e saofai ai i totonu i i, ona talanoa lea i le lautele aua le manuia o le tatou Iunivesite. Ma le agaga faaaloalo.

FOFOGA FETALAI: Tulai mai lau afioga i le Minisita e faauma mai lau saunoaga.

Afioga Hon SEUULA IOANE: Ia faafetai i lau afioga. E faafetai foi i le Minisita o Faatoaga ma le Minisita o Galuega Tetele a lo tatou Malo le fesoasoani mai, aemaise o le sui usufono mo Safata 1. E i ai lava lou talitonuga, e le sua lava se lolo i se popo se tasi. O le tele o sulu o maua ai figota lelei, ae faafetai lava mo le fesoasoani mai. O le tulaga lea ua oo i ai, sa fesoasoani mai foi le sui usufono mai Vaimauga i le faaopoopoina o nisi polokalame i nai tamaiti ia e le au tele o latou maka

i luga. Ua leva ona tapena le Matagaluega o Aoga, ua iloa lelei e le Matagaluega i ana susesuega ma ana sailiiliga, e le o tamaiti uma o le tatou atunuu latou te ausia ia maka o le Iunivesite. E lelei lelei lava mai i lalo i taimi o aoga, e oo atu loa i luga, ia piki loa le kulimi, ae taatia mai pe 80 i le 70% o nai alo ma fanau. O lea la ua faataatia ai le polokalame lea ua taua o le TVET, o la ua amata mai aoga e le gata o galuega i totonu o falefaigaluega, ae faapena le tapenaga o le vaega tau faatoaga. O lea ua amata mai totonu o le tatou Kolisi lea e i ai nei, ona amatamata malie mai i ina, e oo mai i luga, ua mafai ona o ese la auvaega lea e pito i luga i le Iunivesite, ae ua ausia nai tomai faapitoa, e fesoasoani i nai tamaiti ia e amata ai le latou TVET, i so o se mea latou te galulue ma aoga ai. O le agaga maualuga lava o le Matagaluega ia aua ne i tuulafoaia se tasi. Ina ia faaaogaina uma pea nai alo ma fanau, o i ai tomai. E sao lelei lava saunoaga ma fetalai i lenei taeao, e le o tamaiti uma e ausia maka ma tulaga maualuluga faapea, e le o mafai foi la ona tuuese e le Matagaluega lana tilotilo mamao e tatau foi ona i ai se faitotoa e ui ai nai alo ia ma fanau.

I le taimi nei, o lea e tapena le Matagaluega i le isi ana plan e tau o le four year plan. O lenei vaega sei i talanoa atili i ai pe a oo i ai. A o le taimi nei, o fuafuaga alualu mamao lenei, ina ia aua ne i tuua se tamaititi e alu ese mai lona soifuaga faaleaoga. O le vaega foi lea sa saunoa i ai le sui usufono mo Falelatai. E pei ona saunoa mai le Minisita o Faatoaga i mea tau student loan, e manaia foi lenei vaega, o se itu lelei, faafetai mo le fautuaga. Ae taatia mai foi, aua e mafai ona talanoaina ma fetuفاai avatu aumai, ona faapena lea ona iu i se tulaga lelei.

Sa fesoasoani mai le Afioga ia Fonotoe le Taitai o le Itu Agai i ni a tatou polokalame foi lea mo le saga matimati ai pea o alo ma fanau. E 104 a tatou polokalame lea ua faataatia nei e le Iunivesite. E 37 ua uma ona accredit, 15 lea ua faagasolo pea mo le taimi nei e process ai, 48 o lo o faapolokalame mo le afa o lenei tausaga. Masalo e oo atu i le afa o le tausaga ua faataunuuina ia fuafuaga lelei uma.

Ua faamauina le fautuaga e fai ma faapaaga ma nisi aoga faa-Iunivesite mai fafo mo le tatou atunuu. E le o i ai se fuafuaga... ia lea ua saunoa le Taitaifono. E le o i ai se fuafuaga e faatau ese le tatou NUS TV. Na pau le mea lea e manao e faasalalau atu o mea foi ia o air times programmes ina ia fesoasoani mai foi e maua ai foi le tupe a le TV latou ma latou fuafuaga.

E pei o nai nisi na o fautuaga, ia ma nai timaiga na tuuina mai mo le Matagaluega. O le tali atu lea ma le faaaloalo tele. Faafetai.

FOFOGA FETALAI: Malo saunoa i lau Afioga i le Minisita. Ou te tapa lau Afioga i le Taitaifono mo le lafo.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faamaonia e le Fono Aogao*

P.P.2022/2023 Nu.36, Lipoti a le Komiti o le Vaega Tau le Va Fealoai i le P.P.2020/2021 Nu.98 ma le P.P.2021/2022 Nu.53, Lipoti Faaletausaga a le Iunivesite Aoa o Samoa mo Tausaga Faaletupe 2019/2020 & 2020/2021.

Faaluaina e le sui usufono mo Vaisigano 1 ma le sui usufono mo Aana Alofi 1.

Na faamaonia le lafo.

FOFOGA FETALAI: Ou te tapa lau Afioga i le Minisita mo le lafo o le Tali a le Malo.

Afioga Hon SEUULA IOANE: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o le Vaega Tau le Va Fealoai e pei ona tolaulauina.*

Faaluaina e le Minisita mo le Soifua Maloloina, Minisita mo Fesootaiga ma Faamatalaga Vavave Faaneionapo ma le Minisita mo Punaoa Faalenatura ma le Siosiomaga.

Na faamaonia le Tali a le Malo.

FOFOGA FETALAI: Ia, malo le onosai i le tatou Maota. E lelei pea le avatu o se upu a le Nofoa, toe 8 a tatou Lipoti o lo o totoe, a o i ai le faamoemoe o le tatou aso Fono mulimuli lenei ona e tele tuatuagia o le tatou Kapeneta. O le fesoasoani a le Nofoa, ia e lelei le tatou agai sao i Lipoti a le Komiti faapea Tali a le tatou Malo. A o i ai ni fautuaga a outou sui usufono mamalu, ia faaaoga ifo a tatou laptop na sa tufa atu, faamaumau lelei ae pasi i le Minisita ma Taitaifono ona faigofie ai lea o le tatou galuega.

A ua i ai le manatu faapena o le Nofoa, ua utiuti le tatou taimi, ae toe 8 a tatou Lipoti ia e totoe.

Tulai mai lau Afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ia, faafetai o lea ua maua atu o lo o tele foi galuega e feagai ma le Kapeneta, ia faapea foi lea Itu o le tatou faigamalo i afioga i Minisita Lagolago. E talitonu foi e faapena foi lena Itu, o lo o i ai foi tiute o Afioga i sui usufono, a o lea ua aumai lou finagalo toe 8 nai Lipoti ia e totoe. Faamalo galulue, faafetai. Ae ua ou tulai atu ma le faaaloalo e faatu le lafo, *E pasia uma tatou Lipoti ia e totoe tatou malolo ai lea, ona e manatu alofa foi i le Kapeneta ma le latou foi pitolaau ma galuega e tele galuega ma tuatuagia o feagai ma latou.*

O le lafo lea lau Afioga.

FOFOGA FETALAI: E le talia e le Nofoa le lafo. E faaaauau pea le tatou galuega se i fai atu le Nofoa ona tatou agai tonu lea, o lea e i ai nai itula tatou te agai i ai.

**P.P.2022/2023 NU.38, LIPOTI A LE KOMITI O LE VAEGA TAU
LE VA FEALOA I LE P.P.2020/2021 NU.130 MA LE
P.P.2021/2022 NU.56, LIPOTI FAALETAUSAGA A LE
MATAGALUEGA O TINA MA TAMAITAI, ATINAE O NUU
MA AFIOAGA MA AGAFESOOTAI MO TAUSAGA
FAALETUPE 2019/2020 & 2020/2021**

**P.P.2022/2023 NU.85, TALI A LE MALO I LE P.P.2022/2023 NU.38,
LIPOTI A LE KOMITI O LE VAEGA TAU LE VA FEALOA I LE
P.P.2020/2021 NU.130 MA LE P.P.2021/2022 NU.56, LIPOTI
FAALETAUSAGA A LE MATAGALUEGA O TINA MA TAMAITAI,
ATINAE O NUU MA AFIOAGA MA AGAFESOOTAI MO TAUSAGA
FAALETUPE 2019/2020 & 2020/2021 – ILOILOGA**

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Lipoti a le Komiti o le Vaega Tau le Va Fealoai o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Vaisigano 1 ma le sui usufono mo Gagaemauga 2.

Na faamaonia le lafo.

FOFOGA FETALAI: Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga LAUMATIAMANU RINGO M. PURCELL: Lau Afioga i le Fofoga Fetalai i le ava tele e avea ai au ma sui o le Komiti o le Vaega Tau le Va Fealoai e folasia Iloiloga ma Saililiga a le Komiti i lona aotelega i le P.P.2020/2021 Nu.130, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga, Tausaga Faaletupe 2019/2020 ma le P.P.2021/2022 Nu.56, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga ma Agafesootai mo le Tausaga Faaletupe 2020/2021.

1. O Taulumaga.

Lau Afioga i le Fofoga o le Fono, o Lipoti Faaletausaga nei e 2 a le Matagaluega, sa amata galuega a le Komiti i ana Sailiiliga i le aso 23 o Me 2022. Sa auai le Ofisa Sili o Pulega ma le Matagaluega e folasia le aotelega o galuega faatino i le tausaga faaletupe 2019/2020.

Aotelega o Sailiiliga.

E pei ona silafia e le mamalu o lenei Maota, o le Matagaluega o Tina ma Tamaitai, Atinae o Nuu ma Afioga ma Agafesootai ua avea ma sooupu i le va o le Malo ma pulega a alii ma faipule po o faiganuu i so o se vaipanoa e manuia ma atinaeina ai nuu ma afioaga. O le Matagaluega o lo o taimua i le taofia o sauaga i totonu o aiga ma nuu e pei ona tatou matauina i ana polokalame faalauiloa.

Lau Afioga i le Fofoga Fetalai e pei ona atagia i lana vaaiga taulai le tulaga lea, ia taulamua afioaga i atinae mo le manuia o tagata uma, aemaise le latou manulauti, lagolago ma faamalosia afioaga ina ia mafai ona latou taimua i atinae e aofia ma manuia ai tagata uma.

E pei ona folasia i le Lipoti a le Komiti, na mafai ona faatino e le Matagaluega o Tina ma Tamaitai, Atinae o Nuu ma Agafesootai ma ua nofoilo foi le paia ua sasao nei i luitau e pei ona feagai ai le lalolagi ma le Koviti-19 ua aafia ai nisi o faatinoga i tausaga faaletupe e 2 2019/2020 ma le tausaga faaletupe 2020/2021.

Aotelega o Faamatalaga o Tupe a le Matagaluega.

E \$632,715 tupe maua a le Matagaluega i le tausaga faaletupe 2019/2020, ae \$1.1 miliona tupe aoina mo le tausaga faaletupe 2020/2021. E \$8.3 miliona tupe faaalu a le Matagaluega mo le tausaga faaletupe 2019/2020, ae \$9.8 miliona tupe faaogaina mo le tausaga faaletupe 2020/2021. Ma o se faasiliga e \$1.5 miliona pe a faatusatusa tausaga ia e lua.

Lau Afioga i le Fofoga Fetalai, o le faasologa o iloiloga a le Komiti sa maitauina ai nisi o itu taua.

1. Tusi Faalupega

E pei ona faamauina le manatu o le Komiti i le vaega lea, e ao ona silasila i ai le Matagaluega i le mataituina lelei o measina, faalupega ma faalagilagiga a nuu ma afioaga ona e taua. Ua maitauina foi le tele o tusi faalupega ua faatauina e le atunuu e ao ona silasila i le ogatasi ma vaega ia.

2. Uunaia o faigapaaga a nuu ma afioaga ma Matagaluega ma Faalapotopotoga a le Malo.

E manatu le Komiti i le itu lea e faafaigofieina ai ona faatino polokalame faalauiloa mo le manuia o tagata lautele.

3. Taunuuga o faiga faavae mo le tali atu i sauaga.

Lau Afioga i le Fofoga Fetalai pei ona matauina e le Komiti lenei o lo o aliae mai pea sauaga i totonu o le atunuu e aafia ai fanau, o tina ma tamaitai. E ao ona mataituina po o sologa lelei pe tuliloa taunuuga o faiga faavae ua faataoto e le Matagaluega ma ia faamalasia puipuiga ma faalauiloa e taofia ai sauaga.

Ona see mai lea i Fautuaga lau Afioga i le Fofoga Fetalai. I le maea ai o Iloiloga ma Sailiiliga a le Komiti, ma na fautuaina ai e le Komiti le Malo e faapea:

Fautuaga 1

Ia silasila i le iloiloa lelei ma mataituina le sao atoatoa o Faalupega o Nuu ma Afioga, ina ia aua ne i avea ma tulaga e fevaevae'i ai. Ia taulamua le Matagaluega i le puipuia o measina o nu'u ma afioga ina ia aua ne i mou atu i suiga ua i ai nei ona po.

Fautuaga 2

E fautuaina e le Komiti le silasila o le Matagaluega ina ia sao le aoaoina o le upu aiatatau o fanau i tamaiti, ina ia aua ne i avea ma auala e taitaiseseina ai le mafaufau ma le loto i tu ma aga faa-Samoa o le faaaloalo.

Fautuaga 3

E fautuaina e le Komiti le Matagaluega ina ia taulamua ma faamalasia faigapaaga o nuu ma afioga ma Matagaluega ma Faalapotopotoga uma a le Malo ina ia maua avanoa e faatino ai so o se polokalame ma aoaoga mo tagatanuu ina ia faafaigofie le atinaeina o aiga, nuu, ekalesia aemaise le atunuu.

Fautuaga 4

E fautuaina le Matagaluega ina ia mataituina lelei le taunuuga o suesuega ma aoaoga i faiga faavae i le taofiga o sauaga e aafia ai tina ma tamaitai ma fanau.

Iugafono

Na faaiugafonoina e le Komiti Faa-Palemene o le Vaega Tau le Va Fealoai ina ia fautuaina le Fono Aoao Faitulafono ina ia faamaonia ma faautagia lana Lipoti ma Fautuaga i le P.P.2020/2021 Nu.130, Lipoti Faaletausaga a le Matagaluega o Tina ma Tamaitai, Atinae o Nuu ma Agafesootai mo le tausaga faaletupe 2019/2020 ma le P.P.2021/2022 Nu.56, Lipoti Faaletausaga a le Matagaluega o Tina ma Tamaitai, Atinae o Nuu ma Agafesootai mo le tausaga faaletupe 2020/2021.

Ma le faaaloalo lava i lau Afioga.

FOFOGA FETALAI: Malo saunoa i lau Afioga i le Taitaifono.

Ou te tapa lau Afioga i le Minisita mo Tina ma Tamaitai, Atinae o Nuu ma Agafesootai mo le Tali a le tatou Malo.

Afioga Hon LEOTA LAKI LAMOSITELE: Faafetai mo lou avanoa i lau Afioga i le Fofoga Fetalai. E faatalofa atu foi i le paia ma le mamalu o le Maota i lenei itula o le aso.

Ou te tulai atu ma le faaaloalo e tuuina atu Tali a le Malo faatatau i le Lipoti a le Komiti o le Vaega Tau le Va Fealoai e faatatau i le Lipoti Faaletausaga a le Matagaluega o Tina ma Tamaitai, Atinae o Nuu ma Afioga ma Agafesootai mo le tausaga faaletupe 2019/2020 ma le 2020/2021.

Tali

Fautuaga 1.

Ua faamauina e le Matagaluega ma ua talia lelei le fautuaga a le Komiti. O se tasi lenei o vaega taua o galuega a le Matagaluega talu mai le amataga. Peitai ua taatia atu i le Komiti Faufautua a le Faleula, o latou o lo o nafa tonu ma lea vaega ae o lo o fesoasoani i ai le Matagaluega o Tina ma Tamaitai, Atinae o Afioga ma Agafesootai i le latou foi matafaioi. O le faailoilo foi o galuega mo le Komiti Faufautua a le Faleula o lo o taatia i le vaega muamua (Output 1) o le fuafuaga faaletausaga a le Matagaluega. O lo o atagia foi i le fuafuaga o galuega faatino a le Komiti Faufautua le Faleula le toe iloilo ina lelei o faalupega o afioaga taitasi ina ia sao ma atoatoa ae le gata i lea o le taofia o ni feeseeseaiga e tulai mai ai. O le isi vaega taua o lo o faamalosia e le Matagaluega tauala atu i ana Sui o Nuu, Sui Tamaitai o Nuu ma Sui o Malo e uunaia ma faamalosia pulega a alii ma faipule i le faia lea o a latou tulafono faalenuu (village by-laws) e mautinoa o lo o manino faalupega o afioaga ma faatalanoa i pulega a nuu, maua le lotogatasi ina ia aua ne i i ai ni faafitauli e alia'e mai.

Fautuaga 2.

Ua faapena foi ona faamauina e le Matagaluega. Ua faamauina lea vaega taua ua fautuaina ai le Matagaluega. Ae mo le silafia e le Komiti mamalu, o le faa-Samoa o aia tatau a fanau o lo o aoaoina ai o faamanuiaga faavae. O lona aoaoina lena o lo o i ai i polokalame faatino faapea faiga faavae ma fuafuaga a le Matagaluega. O lo o manino foi i totonu o le Feagaiga Faava-o-Malo o Aia Tatau a fanau le uiga loloto ma le faaaogaina faapea ma lona faatinoina. O lo o i ai foi ma le faiga faavae e puipuia ai le saogalemu o fanau. O lo o manino i totonu o lea faiga faavae le taua ma le fesootaiga o faamanuiaga faavae mo fanau, ma lo latou malupuipua i totonu o aiga ma so o se faalapotopotoga e ala i le faaaogaina o metotia o le aganuu faa-Samoa.

Fautuaga 3

E fautuaina e le Komiti le Matagaluega ina ia taulamua ma faamalosia faigapaaga a nuu ma afioaga ma Matagaluega ma Faalapotopotoga uma a le Malo ina ia maua avanoa e faatino ai so o se polokalame ma aoaoga mo tagatanuu ina ia faafaigofie le atinaeina o aiga, nuu, ekalesia aemaise le atunuu.

Tali

O le vaega ua fautuaina mai e le Komiti ua faamauina, ma o se vaega taua o galuega faatino a le Matagaluega o Tina ma Tamaitai, Atinae o Afioaga ma Agafesootai. O lo o faamamafaina pea le faigapaaga ma afioaga ma Faalapotopotoga a le Malo ma le Matagaluega i ana polokalame faatino. O lo o uunaia ma faamalosia nei faigapaaga e tauala atu i Sui o Nu'u, Sui Tamaitai o Nu'u ma Sui o le Malo. O lo o galulue foi le Matagaluega ina ia mautu le faiga faavae aua le faamalosia ma faamanino ai le galulue faatasi ma ana paaga (National Partnership and Engagement Policy). O le isi vaega taua o lo o faamamafaina le fesootai mai muamua o le Matagaluega e ana paaga mo nei polokalame e fia faia i afioaga ma itumalo ae le i faatinoina. O le mafuaaga ina ia mafai ona faasoasoina lelei le taimi ma le avanoa o afioaga mo polokalame taitasi.

Fautuaga 4

E fautuaina le Matagaluega ina ia mataituina lelei le taunuuga o suesuega ma aoaoga i faiga faavae i le taofiga o sauaga e aafia ai tina ma tamaitai ma fanau.

Tali

Ua faamauina le vaega ua fautuaina. O lo o faaauau galuega ma polokalame a le Matagaluega ma ana paaga e faamautinoa ai le faatauaina o faiga faavae ma taiala faapea faavaa ma fuafuaga i le taofiga o sauaga e aafia ai tina ma tamaitai faapea fanau. O nei faiga faavae e aafia ai le Faiga faavae mo le Saogalemu o Aiga; Tafieseaa o Sauaga i totonu o Aiga 2021-2030 faapea foi le Faiga Faavae mo le Tausiga ma le Puipuiga o Fanau 2020-2030. O fuafuaga e pei ona i ai le Fuafuaga a le Lala Maoti o le Atinae o Afioaga 2021-2026 faapea le Fuafuaga a le Matagaluega 2021-2026. O lo o aafia i nei faiga faavae ma fuafuaga galuega faamanatu, faalauiloa ma tulituliloa mo le atunuu lautele ina ia mautinoa o lo o saogalemu ma ola saoloto tagata soifua uma i totonu o siosiomaga o lo o i ai e pei o aiga, afioaga, itumalo, faalapotopotoga eseese faapea foi ofisa faigaluega ma ekalesia. O lo o faaauauina foi polokalame eseese mo le tafieseaa o sauaga faapea le faailoina o auala o puipuiga ma vaega e faaogaina mo le sailia o se fesoasoani. O lo o i ai le Interagency Essential Services Guide (IESG) e faailoa ai ala ma vaega uma e uia mo le fesoasoani i tina ma tamaitai faapea fanau ma i latou e aafia i so o se ituaiga sauaga.

Tuuina atu ma lou faaaloalo. Faafetai.

FOFOGA FETALAI: Malo faafetai. Ia, o lea lava ua manino Tali a le tatou Malo, faapea foi le Lipoti a le Komiti, ma e le mafai foi ona tatou suia. O le taua lea o tatou felafolafoaiga, po o i ai ni mea e le o malamalama ai le tatou Maota i Lipoti ia e pei ona tuuina mai. Ia e pei o le agaga lena, a o i ai ni fautuaga taua, e lelei lava le faapepa ae tuuina atu i le Minisita ma le Taitaifono mo le agai i luma o lea Matagaluega ma lea Matagaluega.

Ia ua avanoa le tatou Maota mo se tasi o sui usufono e fia malamalama atili i le Lipoti lea. Tulai mai lau Afioga i le Minisita.

Susuga Hon Laauli Leuatea Polataivao Fosi: Ioe, ua alofa atu lava ona o lea tatou te tulitulimatagau le tatou taimi ae taua tele foi le tatou galuega lau Afioga. E le na ma se laina le taua foi o lenei taimi ma le tatou faasologa.

Ae na ona tuualalo atu lava lau Afioga i le Fofoga Fetalai, e a pe a fili mai se tasi o le la Itu ma se tasi o lenei Itu, ua lava tootoo e 2, ona ave lea o le avanoa i le Afioga i le Taitaifono ma le, e tulimatagau ai le tatou taimi. A o nisi finagalo, ia na faapepa lea pei ona e saunoa i laptops ia. O si au lena fesoasoani atu.

FOFOGA FETALAI: Ia, e manaia foi le fautuaga a le Minisita lea ua tuuina mai. O le agaga lava o le Nofoa, ia ona o Lipoti lava ia o lea ua tali le Malo ma e le mafai ona tatou toe suia. Pau lava le mea a o i ai ni mea e fia malamalama i le Lipoti, ia o le avanoa lea. O lea foi ua aumai le fautuaga a le Minisita, ia, aua le faagasologa o le tatou galuega.

Tulai mai le sui usufono mo Faleata 4 i se mea e te le o malamalama ai i le Lipoti.

Tofa ALE VENA ALE (Faleata 4): Lau Afioga i le Fofoga Fetalai, faafetai i lau Afioga i le Fofoga Fetalai mo le avanoa. Ua tatou i ai foi i lenei aoauli i taualumaga o le tatou Fonotaga. Malo tautai ae i lau Afioga faapea foi sui usufono mamalu o lenei Maota.

Ua ou tulai atu ma le faaaloalo tele, ua matagofie foi. O matou nei e toatolu o lea o le a faapepa uma atu matou Lipoti uma nei e totoe lau afioga, ua matua malamalama ma manino lelei ma e talia atoatoa Lipoti a le tatou Maota Fono ma Matagaluega. Faafetai.

FOFOGA FETALAI: Malo faafetai. Ia aua foi ne i avea le upu a le Nofoa ma mea o le a taomia ai le le malamalama i tatou Lipoti. Ae afai lava o le finagalo lea, ia se i tulai mai Sala, Sagaga 3.

Afioga Hon SALA FATA PINATI: Faafetai i lau Afioga i le Fofoga Fetalai.

Lau Afioga i le Fofoga Fetalai ua ou tulai atu, o lea na tulai atu le matou Taitai analeila i se taimi e le i mamao atu sa avatu ai se lagona. O le upu moni lava ia ma e tautino lau Afioga i le Fofoga Fetalai, se ua atoatoa le Tali a le Malo. Faafetai. O outou mama na. O le galuega o le galuega a tatou. Aua e ui ina eseese o tatou... ae ala e tasi mea uma, o Samoa lea e saili i ai tatou. O le manuia o Samoa lena e i outou aao, e lagolagosua foi lenei Vaega. Ma te le o ese ai. A o le matou tali atu lea pei ona aumaia lau fesili lau Afioga, ma te tulai atu ma te lagolago mea uma e saunoa i ai le Aiga Minisita. Ma le faaaloalo lava.

FOFOGA FETALAI: Malo faafetai. Ia, vaai i ai i le manaia o le tatou Fono. Tulai mai lau Afioga i le Taitaifono mo le lafo.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai...

FOFOGA FETALAI: Malie le Taitaifono, se i tulai mai le sui usufono mo Vaimauga 1. Tasi lenei sui usufono e malamalama gofie i Lipoti. Tulai mai.

Afioga SULAMANAIA FETAIAI TAUILILI TUIVASA: Faafetai. O le tulaga lava ia e pei ona faasau ai foi le tatou Lipoti lenei pei ona fai atu foi se tala a lenei usugafono, o se agaga faafetai. E pei foi ona maua i lenei itula le Lipoti. Ae fia fai lava se sao ona o le faataua foi o le tulaga o le Lipoti a le Taitaifono ma le Komiti aemaise foi o le Minisita sa i ai ma le tulaga i le...

O le tulaga i le Lipoti lau Afioga, o le tulaga lea o faalupega o nuu o le taua ia, pei o le fautuaga 1. Ia o le tuualalo lava a lenei itumalo ona o le tele foi o mea na tutupu i si o tatou atunuu ma le tulaga foi sa i ai, ona ua pei ua faatopetope mai e le Matagaluega taimi e avatu ai i totonu mea o faalupega o nuu. Ia e tau loa faalupega o nuu, e leai lava se nuu e le fia faia ni tulaga faapena. Ae o le agaga lava ia o lou manatu lau Afioga i le Fofoga Fetalai, taatia pea le tulaga i faalupega i nuu ia, aua e ala ona sui faalupega o nuu, e pei ua poloaiina atu e le Matagaluega ina ia aumai i totonu faasaoga. Ae a leai lava ni faasaoga pei o le agaga lena e avatu ai le tuualalo. E tau loa mea ia o faalupega lau Afioga i le Fofoga Fetalai, ia e vavao ai nuu.

O le agaga faafetai foi o lenei sui usufono i mea ia e tau o by-laws, tulafono foi ia a nuu lava ia lea e faatino. O le agaga faafetai lau Afioga i le Fofoga Fetalai, o lea ua amanaia tatou tulafono ia, by-laws i totonu o Faamasinoga. Po o le a le tulaga e i ai, pe alu foi se sui o le nuu e ave le nuu i totonu o le Faamasinoga o Fanua ma Suafa, o lea ua amanaia tulafono ia bylaws a tatou lava nuu ma afioaga ua resitala i totonu o le Ofisa o Faamasinoga ua aoga ai. E pei o le agaga taua lena i lou sui usufono.

Ia pei na pau lena o se agaga e avatu ai le faafetai a lenei itumalo i le Lipoti matagofie ua saunia e le Taitaifono aemaise foi o le Minisita o Tina ua tulai mai. Ma lou agaga faaaloalo lau Afioga i le Fofoga Fetalai.

FOFOGA FETALAI: Malo faafetai, malo saunoa i lau Afioga i le sui usufono mamalu. Se i tulai mai lau Afioga i le Taitaifono.

Afioga LAUMATIAMANU RINGO M. PURCELL: Ua faamauina le fautuaga foi a le sui usufono mai Vaimauga 1 e tusa ai foi o le Lipoti a le Komiti. Ua lagolagoina foi le tatou Tusi Faalupega e pei ona matauina e le Komiti. Ia e le tasi se Tusi Faalupega o lo o i ai si o tatou atunuu, e tele Tusi Faalupega, e i ai foi eseeseega o Faalupega o nuu, o le ala lea o lea e fautua atu ai le Komiti i vaega ia, ae faafetai o lea ua faamauina e le Malo i Tali na tuuina mai.

E momoli foi le agaga faafetai i le Tamaitai Ofisa Sili o Pulega ma le latou Matagaluega i le tapenaina o Lipoti, aemaise foi o le tali atu i manaoga o si o tatou atunuu. Ma le faaaloalo.

FOFOGA FETALAI: Malo. Tulai mai lau Afioga i le Minisita o Tina pe a o i ai se mea e te fia saunoa ai pe ua atoatoa?

Afioga Hon LEOTA LAKI LAMOSITELE: Faafetai mo le avanoa. E le o tele la nisi mataupu o totoe o lea ua tele ina maua atu i finagalo faaalai le lagolagoina foi o le Lipoti ma Fautuaga ua aumai.

Na o le pau lava si tamai mataupu lea sa lavea mai i le faamatalaga a se tasi pei lava o le sui usufono o Salega 1 analeila e faatatau i le polokalame lea faamalositino, lea sa taua ai le matou Matagaluega. Mo le silafia o lea ua fai foi le iloiloga o le taunuuga o le polokalame lea i lenei taimi talu mai le vaegatupe lea na faamatuu atu i tua i tatou itumalo. Ou te talitonu o le a galulue faatasi le Matagaluega o Tina ma Tamaitai faapea foi le Matagaluega o le Soifua Maloloina i le toe tilotilo i le iloiloga o le polokalame lea, po o a foi ni lesona ma ni aoaoga na maua mai ai i le faatinoina o polokalame ia i le taimi ua fano ma le agai i luma i le tilotilo i ai. Aua o lea sa aumai le talosaga i se tupe faaopoopo. Ia ou te talitonu o le a fuafua le vaega lea i le tulaga o lo o taatia ai le iloiloga lea o lo o faatino i le taimi nei. E maua atu lava se faamatalaga pe a oo i le taimi e tolaulau ai le tatou Tala o le Tupe. Ae taua polokalame ia, ona o polokalame ia o lea o le a soosootauu ma le Matagaluega a le Soifua Maloloina ina ia mafai ai pea ona tatou tulia le faamoemoe.

O lau maitau lava i ai aua o se luitau lava i lenei vaitau le tatou mataupu lava lea o le NCD ma isi faamai faapea, o lea e i ai foi lava fesili po o ai e faia nei polokalame. Ae o lau tilotilo i ai, o oe lava e toatasi e faia lau polokalame. O se faataitaiga lelei lava e te faia, o lou tilotilo i le faata i taeao uma lava, ona e vaai lea i ai po o a ni suiga o i ai ia oe, ona e te iloa ai lava i ina le mea la e tupu ai. Aua fai mai le isi faamatalaga, you are

what you eat. O ou foliga e tau mai i ina le mea la e te taumafa ai. O lona uiga a faapea e te tagai atu i le faata i le taeao e pei ua e tau lapoa po o se tulaga faapena, ona fai lea o lau fuafuaga i ai ma tou faagaoioi ai lea o le tou polokalame ma lou aiga. O se polokalame taugofie tele lena polokalame, e leai se tupe e tau alu ai, e te le tau alu e faalogo i se isi tagata e alu atu e tolaulau atu ia oe po o a mea e tatau ona e faia. O le tausiga lava o le soifua manuia o le tagata ia, o lana matafaioi lena e tatau ona faamuamua ia te ia.

Ia, e pei o se fautuaga lena i le mamalu o le tatou Maota, e fuafua foi agai i ai o tatou mafauauga mo le tatou tapenaga mo le agai i luma, aemaise o le polokalame e pei ona fautua mai ai le Minisita o le Soifua Maloloina.

Ia o se faaopoopoga atu lea i le tatou mataupu e pei ona talanoaina. Ae ave lenei taimi e momoli atu ai le faafetai i le Matagaluega ona o le Lipoti e 3 tausaga sa i ai. E talitonu foi sa aafia ma galue ai foi nisi o Minisita o le Kapeneta sa i ai. Faamalo faafetai e tusa ai foi ma galuega sa alo atu i ai i le faatinoga i lea taimi. Ae le gata foi i lea, e momoli atu foi le faafetai i le Tamaitai Ofisa Sili o Pulega faapea ma le Pulega e tusa ai foi ma le faatinoina e pei ona faaauau ai le tautua a le Matagaluega tau mai lenei taimi. Ma le faaaloalo lava. Faafetai.

FOFOGA FETALAI: Malo saunoa i lau Afioga i le Minisita. E tasi lava si mataupu lea na laga mai e Vaimauga 1, o le tatou Tusi Faalupega. O lea ua aumai le Fautuaga i lau Afioga ma le Matagaluega, atonu o lena ua faamauina e le Matagaluega aua lava le tatou Tusi Faalupega e pei ona i ai i le Lipoti. Malo faafetai.

Ou te tapa lau Afioga i le Taitaifono mo le lafo.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa o le P.P.2022/2023 Nu.38, Lipoti a le Komiti o le Vaega Tau le Va Fealoai i le P.P.2020/2021 Nu.130 ma le P.P.2021/2022 Nu.56, Lipoti Faaletausaga a le Matagaluega o Tina ma Tamaitai, Atinae o Nuu ma Afioga ma Agafesootai mo Tausaga Faaletupe 2019/2020 & 2020/2021.*

Faaluaina e le sui usufono mo Vaisigano 1, sui usufono mo Aana Alofi 1 ma le sui usufono mo Aana Alofi 3.

Na faamaonia le lafo.

FOFOGA FETALAI: Ou te tapa lau Afioga i le Minisita mo Tina ma Tamaitai, Atinae o Nuu ma Afioga ma Agafesootai mo le lafo i le Tali a le tatou Malo.

Afioga Hon LEOTA LAKI LAMOSITELE: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o le Vaega Tau le Va Fealoai e pei ona ou tolaulauina.*

Faaluaina e le Minisita mo le Soifua Maloloina, Minisita mo Leoleo ma Falepuipui, Pulega o Tinei Mu ma Faalavelave Faafuasei, Minisita mo Fesootaiga ma Faamatalaga Vavave Faaneionapo ma le Minisita mo Punaoa Faalenatura ma le Siosiomaga.

Na faamaonia le Tali a le Malo.

**P.P.2022/2023 NU.39, LIPOTI A LE KOMITI O LE VAEGA TAU
LE VA FEALOAI I LE P.P.2020/2021 NU.133 MA LE
P.P.2021/2022 NU.15, LIPOTI FAALETAUSAGA A LE PULEGA
O FAAILOGA MA TUSIPASI TAUALOA A SAMOA MO
TAUSAGA FAALETUPE 2019/2020 & 2020/2021**

**P.P.2022/2023 NU.86, TALI A LE MALO I LE P.P.2022/2023 NU.39,
LIPOTI A LE KOMITI O LE VAEGA TAU LE VA FEALOAI I LE
P.P.2020/2021 NU.133 MA LE P.P.2021/2022 NU.15, LIPOTI
FAALETAUSAGA A LE PULEGA O FAAILOGA MA TUSIPASI
TAUALOA A SAMOA MO TAUSAGA FAALETUPE 2019/2020 &
2020/2021 – ILOILOGA**

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faautagia le Fono Aoa le Lipoti a le Komiti o le Vaega Tau le Va Fealoai o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mamalu mai Vaisigano 1 ma le sui usufono mamalu mai Aana Alofi 3.

Na faamaonia le lafo.

FOFOGA FETALAI: Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga LAUMATIAMANU RINGO M. PURCELL: Lau Afioga i le Fofoga Fetalai, ou te tulai ma le faaaloalo tele e fai se tala puupuu i le iloiloga a le Komiti i le P.P.2020/2021 Nu.133, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga

Faaletupe 2019/2020 ma le P.P.2021/2022 Nu.15, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe 2020/2021.

1. Taualumaga

Na amata galuega a le Komiti lenei i le Pepa o le Palemene ua taua i le aso 19 Me 2022, na auai le Afioga i le Tamaitai Ofisa Sili o Pulega sa i ai ma le Pulega, e folasia le aotelega o galuega na faatino i le tausaga faaletupe 2019/2020 ma le 2020/2021.

2. Aotelega o Saililiga

Lau Afioga i le Fofoga Fetalai ma le paia o lenei Maota, na faamauina e le Komiti o Galuega galuega faatino a le Pulega o Faailoga Taualoa a Samoa mo tausaga faaletupe e 2, 2019/2020 ma le 2020/2021. O galuega faatino ua taulai ina ia talafeagai, ia mauagofie avanoa ma faatumauina tulaga aupito sili ona lelei o aoaoga faaauau mo tagata o Samoa, ia siitia ai le tamaoaiga. Ae fai mai foi le manulauti a le Pulega, ia faatonutonu, faamaonia ma faafoe ia aoaoga e faaauau e ala i le galulue faapaaga ma paaga masani e siitia tulaga aupito sili ona lelei o aoaoga mo tagata uma i Samoa.

E pei ona folasia i le Lipoti a le Komiti ua i le Laulau a Fono a le Fono Aoa, na mafai ona resitalaina e le SQA polokalame ma aoaoga i aoga faaauau, aoaoga pupuu aemaise foi nisi o polokalame i aoga a matata, e le gata i lea, a o maliega na sainia ma suesuega na faatautaia e le Ofisa.

3. Faamatalaga o Tupe

E \$4.7 miliona le tupe maua a le Pulega i le tausaga faaletupe 2019/2020. E \$5 miliona tupe a le Pulega i le tausaga faaletupe 2020/2021. O se faasiliga e \$350,283.

4. Itu Taua na Maitauina e le Komiti

Lau Afioga i le Fofoga Fetalai, tau ia ina ou pa'i i itu taua na ala ai ona fausia fautuaga a le Komiti.

1. Aloaia o Tusi Pasi o le Iunivesite Aoa o Samoa.
Na laga e le Komiti le tulaga lea ina ia silasila le Pulega i le faataatitia o faatalanoaga ma nisi o atunuu i fafo ina ia mafai ona amanaia faailoga ona o le tele o tupe na faaalu aemaise o taimi o fanau aoga mo ia faailoga tikeri.
2. O le faaliliuina o igoa faa-Peretania o polokalame ua tuuina mai i Lipoti Faaletausaga a le Matagaluega.

Lau Afioga, ona see mai lea i Fautuaga. I le maea ai o iloiloga ma saililiga a le Komiti ma e fautuaina ai le Malo e faapea:

Fautuaga 1

Ia faatino le faagaoioiga o faiga faavae ma fuafuaga mo le amanaia ma le aloaia o Tusi Pasi ma Faailoga Taualoa a le Iunivesite Aoao o Samoa i atunuu i fafo.

Fautuaga 2

E fautuaina le Pulega ina ia silasila i le faaaogaina o la tatou Gagana Samoa i le faaigoaina o aoaoga ma polokalame i Lipoti ma so o se fesootaiga e tuuina mai i le Palemene mo iloiloa o ia galuega faatino.

Iugafono

Na faaiugafonoina e le Komiti Faa-Palemene o le Vaega Tau le Va Fealoai ina ia fautuaina le Fono Aoao Faitulafono, *Ina ia faamaonia ma faautagia lana Lipoti ma Fautuaga i le P.P.2020/2021 Nu.133, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe 2019/2020 ma le P.P.2021/2022 Nu.15, Lipoti Faaletausaga a le Pulega o Faailoga ma Tusi Pasi Taualoa a Samoa mo le Tausaga Faaletupe 2020/2021.*

Ma le faaaloalo lava i lau Afioga.

FOFOGA FETALAI: Malo faafetai i lau Afioga i le Taitaifono. Ou te tapa lau Afioga i le Minisita o Faailoga Taualoa mo le Tali a le tatou Malo.

Afioga Hon SEUULA IOANE: Lau Afioga i le Fofoga Fetalai ou te tolaulauina Tali a le Malo e faatatau i Fautuaga a le Komiti o le Vaega Tau le Va Fealoai e pei ona folasia manino e le Afioga i le Taitaifono.

Fautuaga 1

Ia faatinoga le faagaoioiga o faiga faavae ma fuafuaga mo le amanaia ma le aloaia o Tusi Pasi ma Faailoga Taualoa a le Iunivesite Aoao o Samoa i atunuu i fafo.

Tali

- i. Ua maea tapena ma faatino galuega e tusa ai ma Faiga Faavae ma Fuafuaga mo le Faamaoniga o Polokalame (Programme Accreditation) o Aoga Faaauau faapea ai ma le Lesitalaina o Faailoga (Registration of Qualifications) i luga o le Faava'a o le Faavasegaga o Faailoga ma Tusi Pasi Taualoa a Samoa (SQF). E aofia ai ma le Iunivesite Aoao a Samoa.
- ii. O lo o maioio nei vaega taua i totonu o le Faiga Faavae o le Faava'a o le Faavasegaga o Faailoga ma Tusi Pasi Taualoa a Samoa (SQF Policies June 2012) ina ia ogatasi ma se tasi o matafaioi autu ina ia tuuina atu faamaoniga faapea o aoaoga faaauau i totonu o Samoa o lo o faatumauiina ai le tulaga tutusa

faava-o-malo e faaoga ai Tulaga Aupito Sili ona Momia (Quality Standards)

3. O le faamoemoe maualuga, e le gata ina ia siitia le aofai o faailoga ma tusi pasi taualoa ua maea ona faamaonia ma lesitala i luga o lenei Fa'ava'a, ae o le a faafaigofie ai foi ona faatusatusa tomai, silafia ma agavaa o a tatou faailoga ma Faavaa a isi atunuu .

4. O lenei faatinoga o le a laugatasi ma agavaa uma ai ai Aoga Faaauau i Samoa e aofia ai le Iunivesite o Aoao o Samoa, e ala i le ausia o Tulaga aupito sili ona manaomia e faamaonia ai a latou faailoga ma tusi pasi taualoa e atunuu i fafo.

FUAFUAGA A LE PULEGA

1. O loo sosolo lava le faatinoga o galuega a le Pulega e tusa ai ma Taiala mo le Atinae o Samoa 2016-2020 e aogfia ai Fuafuaga a le Vaega o Aoaga 2019-2024, Fuafuaga Faataatitia mo Aoaga Faaauau (Fuafuaga Autasi a le Pulega o Faailoga ma Tusi Pasi Taualoa o Samoa) 2017-2020.

2. E fautuaina le Pulega ina ia silasila i le faaaogaina o la tatou Gagana Samoa i le faaigoaina o aoaoga ma polokalame lipoti ma soo se fesootaiga e tuuina mai i le Palemene mo iloiloga o ia galuega faatino.

- i. O le a mataitu e le Pulega o Faailoga ma Tusi Pasi Taualaoa a Samoa le fautuaga ua tuuina mai mo le faaaogaina o le Gagana Samoa i le faaigoaina o polokalame i lipoti ma soo se fesootaiga e tuuina atu i le Palemene mo iloiloga o ia galuega faatino
- ii. O lea saunia foi e le Pulega se Pepa o Faamatalaga e faailoa ai i Aoga Faaauau le fautuaga ua tuuina mai ma tapa se latou maliliega mo le faaogaina o le Gagana Samoa u ke faaigoaina o a latou polokalame i Lipoti a le Pulega e tuuina atu i le Palemene mo iloiloga o ia galuega faatino.
- iii. O le a faailoa foi e le Komiti Faafoe le fautuaga ua tuuina mai ma tapa sa latou fautuaga.

Ma le faaaloalo lava Faafetai .

FOFOGA FETALAI: Malo faafetai mo le tolaulauina o Tali a le tatou Malo aua lava le lipoti pulega o faailoga ma Tusi Pasi Taualoa e pei ona saunoa iai le Taitaifono malo faafetai i lau Afioga i le Minisita, o lea ua tatou taunuu mai i le tatou malolo o le afiafi o le mea lea o lea tatou saili malosi faataatiaese la tatou galuega mo le malologa o le afiafi.

Na faataatiaese Taulumaga a le Fono Aoaofaitulafono mo lana malologa i le itula e 3:48 ma toe faaauau i le itula e 4:14 i le afiafi

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono. Faamalo le onosai i le tatou Maota, e faataatiaese tatou taulumaga mo le malologa ua maea folasia ia Tali a le tatou Malo, Fautuaga a le Komiti o le avanoa lenei mo se tasi o sui e leo malamalama i le tatou Lipoti, sei tulai mai lau Afioga i le sui mamalu mai Alataua i Sisifo.

Afioga ALIIMALEMANU MOTI MOMOEMASU ALOFA TUUAU (Alataua i Sisifo): lau Afioga i le Fofoga Fetalai faafetai ua maua se faasiliga malosi i le Palemene i lenei aoauli ae momoli atu le faafetai i le Taitaifono ma le Pulega faapea foi le Afioga i le Minisita mo le tali malamalama ae o le mea e fia malamalama ai . O le fesili ona lea matau atu i le lipoti faaletausagea o lea lavea ai foi ma tusi pasi o aoga faafaifeau lea i Malua ma Piula. O la'u fesili la e iai ia nisi o le aufaigaluega o ni faifeau poo le au faigaluega tofofi o le Atua o i ai totonu o le iloiloina o Tusi Pasi a Aoga faafaifeau. Aua o lea foi e ave iai e accredit mai ai Tusi Pasi o Aoga Faafaifeau, o le fesili lena, pe o iai se isi o le Aufaigaluega tofofi o le Atua e iai totonu o le pulega lea i taimi lauliliu ai ia Tusi Pasi Taualoa? O le fesili lena faafetai e aoga le Pulega e foia ai le faafitauli o le omai o isi ma latou tusi pasi le moni mai fafo. Ia omai lea o latou saofafai i tulaga maualuluga o le tatou atunuu ao le aoga tonu a lea o le tatou Pulega lea e foia ai ai faafitauli, ma le faaloalo faafetai mo le avanoa.

FOFOGA FETALAI: Malo faafetai saunoa faafetai manaia le fesili, ia lea ua matau atu na o le tasi a le fesili, ia tulai maia lau Afioga i le Taitaifono e tali le fesili lea ua tuuina mai e le sui mamalu.

Afioga Hon LEOTA LAKI LAMOSITELE: Faafetai atu i le sui usufono mai Alataua i Sisifo e tusa ai foi ma le faafesili poo iai se faifeau i totonu o le Komiti o loo iloiloina ia Lipoti ia. E faamanino atili o le aoga faifeau. O lo o iai ia aoga faaauau foi ia resitala i tausaga uma e tai pei o Malua, Aoga Katoliko, faapena le Metotisi o loo iai i totonu o aoga faaauau ia. Ina nei ou tali atu ioe pe leai a o le taimi nei e leo maua e le Komiti i latou o loo iai i totonu. Manatu o lea faafofoga mai le Afioga i le Minisita ao le tulaga lea iai o Aoga faaauau o le aafia i totonu o aoga faaauau ia Kolisi ia Faafaifeau e iai Malua ma le Metotisi i tulaga ia ae le o maua e le Taitaifono o le Komiti ma le Komiti nei poo iai se faifeau i le komiti lea e iloiloina ia tulaga ia ma le faaloalo. Ae o se avanoa lelei foi e momoli atu ai le agaga faafetai i le Matagaluega aemaise o le Komiti faafoe i le faatinoina foi o galuega tausaga ia e lua e iai a le talitonuga sa

outou galulue ma le punouai i le faatinoina foi o le tou pitolaau i le mataitu ina o aoga faaauau aemaise o aoaoga faaopopo ma polokalame aua si o tatou atunuu momoli atu ai le agaga faafetai aemaise ai foi o le Minisita o Aoga o latou o loo faapena ona iai le faatomuaga o tonu fai o totonu Matagaluega aemaise o le vaega lea o le Tusi Pasi Tauloa a Samoa i lea tausaga ma lea tausaga ma le faaloalo .

FOFOGA FETALAI: Malo faafetai lau Afioga i le Minisita o Aoga poo iai se fesoasoani mo le faafesili a le sui usufono mai Alataua i Sisifo.

Afioga Hon SEUULA IOANE: Faafetai lau Afioga i le Fofoga Fetalai ou te tali puupuu atu i le fesili e pei ona fesiligia. Pe iai se tasi o le au faigaluega a le Atua i totonu o le Pulega a le SQA? O le tali o loo iai o loo iai ia sui mai aoaoga taitasi o loo iai i totonu e le gata i lea e iai foi faiga faavae a le SQA e tuuina ai totonu o soo se Faalapotopotoga ma Aoaoga pei o le faataitaiga ia atoa itula o aoaoina ni mataupu, ia lelei le attendance o ituaiaga mea uma faapena e mulimulitai ai le SQA ia latou tilotilo ai foi ma ausia tulaga e tatau ai ona aloaia se tusi pasi o le tali atu lea ma le faaloalo .

FOFOGA FETALAI: Malo faafetai atonu o lea faafogafoga maiale sui o Faletalai ma Samatau aua o latou Tusi Pasi sa fai i Malua na ui foi le auala lea ae malo faafetai o lea tali malamalama lau Afioga i le Minisita atonu o lea ua manino ai foi le faafesili a le sui mai Alataua i Sisifo malo a faafetai, ou te tapa lau Afioga Taitaifono mo le lafo.

Afioga LAUMATIAMANU RINGO M. PURCELL: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa o le P.P 2022/2023 Nu 39 Lipoti a le Komiti o le Vaega Tau Va Fealoai i le P.P 2020/2021 Nu 133 ma le P.P 2021/2022 Nu 15 Lipoti Faaletausaga a le Pulega o Faailoga ma Tusi Pasi Tauloa o Samoa mo Tausaga Faaletupe 2019/2020 ma le 2020/2021.*

Faaluaina e le sui usufono mamalu mai Vaisigano I.

Na faamaonia le lafo.

FOFOGA FETALAI: Ou te tapa lau Afioga i le Minisita mo le lafo o le Tali a le tatou Malo.

Afioga Hon SEUULA IOANE (Minisita o Aoga, Taaloga ma Aganuu ,Pulega o Faailoga ma Tusi Pasi Tauloa a Samoa ma le Iunivesite Aoa o Samoa): Lau Afioga i le Fofoga Fetalai ou te faatu le lafo , *Ina ia faamaonia e le Fono Aoa Tali a le Malo i fautuaga a le Komiti i le Vaega Tau i le Va Fealoai e pei ona ou tolaulauina.*

Faalua e le Afioga i le Minisita o le Soifua Maloloina faapea le Minisita o Fesootaiga ma le Minisita o le Siosiomaga

Na faamaonia le Tali a le Malo.

P.P.2022/2023 NU.49, LIPOTI A LE KOMITI O TUPE MAUA MA TUPE TOTOGI I LE P.P 2020/2021 NU.99 MA LE P.P.2021/2022 NU.27 LIPOTI FAALETAUSAGA A LE FAALAPOTOPOTOGA O MEA TAU FALE A SAMOA MO TAUSAGA FAALETUPE 2019/2020 ma le 2020/2021

P.P.2022/2023 NU.143 TALI A LE MALO I LE P.P.2022/2023 NU.49 LIPOTI A LE KOMITI O TUPE MAUA MA TUPE TOTOGI I LE P.P.2020/2021 NU.99 MA LE P.P.2021/2022 NU.27 LIPOTI FAALETAUSAGA A LE FAALAPOTOPOTOGA O MEA TAU FALE A SAMOA MO TAUSAGA FAALETUPE 2019/2020 MA LE 2020/2021

FOFOGA FETALAI: Tulai mai lau Afioga i le Taitaifono o le Komiti o Tupe Maua ma Tupe Totogi .

Afioga FALEOMAVAEGA TITIMAEA TAFUA: Ma le faaaloalo lava lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Lipoti a le Komiti o Tupe Maua ma Tupe Totogi o loo tuuina atu ai ana Sailiiliga, Fautuaga ma Iugafono*

Faalua e le sui usufono mo Lefaga ma Faleaseela ma le sui usufono mo Vaisigano I.

Na faamaonia le lafo.

FOFOGA FETALAI: Ou te tapa lau Afioga i le Taitaifono mo le tolaulauina o Sailiiliga , Fautuaga ma Iugafono a le Komiti.

Afioga FALEOMAVAEGA TITIMAEA TAFUA: Faafetai mo le avanoa lau Afioga i le Fofoga Fetalai .

O le Faalapotopotoga o Mea Tau Fale a Samoa

TAUALUMAGA

I tualumaga a le Komiti na iloiloaina ai faamatalaga o Tupe Matafaioi ma Matatia ausia a le Faalapotopotoga o Mea Tau Fale a Samoa o loo faamauina i ana lipoti faaletausaga 2019/2020 ma le 2020/2021.

SAILILIGA A LE KOMITI

O le sini autu na faavae ai le Faalapotopotoga o Mea Tau Fale Samoa o le tuuina atu lea o fesoasoani mo faaunegatupe i tuutuuga mama e lagolago ai le mamalu o le atunuu e maualalo le tamaoaiga e faalelei ai falenofo ma fesoasoani ai i le faatauina o fanua umiasaoloto o tagata faigaluega aemaise ile faaaogaina o fanau .

Na matauina ai le agai pea i luma o tupe maua mai le lisiina atu o falenofo a le Malo o lea ua tuuina atu i le Faalapotopotoga o Mea Tau Fale mo le lisiina i tulaga faapisinisi (commercial rents)

MATATIA AUSIA.

Na siitia i le \$2.3 miliona tupe faasili a le Faalapotopotoga i le 2020/2021 nmai le siitia o Tupe Maua mai Tului ma Tupe Totogi o Nonogatupe faapea ma legasolo lelei o auuanaga o fale mau totogi e \$22.2 miliona na siitia ai le aofaiga o nonogatupe faamautu faamatuuatua i le 2020/2021. O le siitaga e \$2.4 miliona pea faatusatusai le \$19.8 miliona sa faamatuuatua i le 2019/2020. Ona o lea tulaga na siitia ai foi le aofaiga o (total loans portfolio) o nonogatupe mai le \$60.4 miliona i le 2019/2020 i le \$65 miliona i le 2020/2021 e tusa o le 8% ua siitia ai .

ASIASIGA A LE KOMITI

Na asiasia e Komiti le Faalapotopotoga o Mea Tau Fale a Samoa ma le faamoemoe ina ia faamalieina le toe lipoti atu o le komiti i le Palemene, i vaega tau tupe maua ma tupe faaalu a le Faalapotopotoga i Poloketi ma galuega o loo faatinoina e le Faalapotopotoga. Na matauina e le Komiti le galuega fita o loo feagai ma le Faalapotopotoga i le taumafai lea e toe fausia nisi o falenofo ua manaomia galuega toe faaleleia. O nisi o fale ua maea galuega o loo tuuina i lalo ona ua le toe saogalemu mo le lisiina atu o le tele foi o fale o loo faagasolo ai iloiloga o le mataituina poo lelei atoatoa mo le saogalemu o tagata o loo faaaogaina. O loo faagasolo pea poloketi o le fausiaina o fale fou ma taumafai e faaaoga e utilize uma avanoa o eleele fausia ai fale talafeagai ma le tulaga o fanua. E manatu le Faalapotopotoga o se faasiliga foi lea ia i latou tupe maua pea tele ni fale e lisiina atu aemaise o le mafai ona tali atu i manaoga lautele a e o loo tusi talosaga atu i le Ofisa. O le taimi nei ua faatumulia uma fale nofo o loo lisiina e tusa o le 100% o fale o loo nofofo mautotogi ai tagata, sei vagana ai fale fou o loo fausia i Motootua e lei nofoia. Ae ua faamautu mai e le Faalapotopotoga le tele o tusi talosaga a tagata mo ni fale e lisi ai e le gata o le lelei o le nofoaga o loo iai fale mau totogi a le Malo ae o le gafatia o le tau o le lisi i le masina e \$850 mo fale e 3 potu moe, e \$680 mo le fale e 2 potu moe, ae \$400 i le na o le tasi potu moe i le masina. Na maua i le asiasiga a le Komiti o Fanua o le Malo i Taumeasina o loo vaaia e le Faalapotopotoga ua tataua ona toe atinae leni nofoaga e avea o se nofoaga tutotonu. E i ai ni fale mautotogi e nofoia mo se taimi puupuu.

O le faamamafa a le Komiti o le a siitia vaega o Tupe Maua a le Faalapotopotoga pea faataunuu lea faamoemoe, ona e le gata ina lelei le nofoaga e tu lata i le taulaga toe latalata i matafaga e fiafia turisi e agai iai.

Na faailoa e le Faalapotopotoga lo latou atugaluga. E tele le avanoa e mafai ai ona tulai mai lenei miti peitai e faasee atu Fanua ma Fale o le Malo i le 2013, e leai se vaega tupe na faaagaga e toe fausia ma faaleleia ai fale nofo. I lenei fesuiaiga o loo aofia i faamaumauga na iai nisi o fale na faamauina e faasee atu i le Faalapotopotoga ae ua maea talaina i lalo, toe o fanua o loo iai na faamauina e le Komiti o loo lelei le gasologa o le faatinoina o Galuega faalelei mo le vaaia lelei o fale o le Malo. Na faafetai ai le Pulega mo galuega maeaea ma le fita e ui o faafitauli e ali ae mai i le faasoasoatauina o tupe a le Malo mo le taumafai e saili paaga mo ni poloketi, na faailoa mai e le Faalapotopotoga o le faafitauli tuga o loo latou feagai nei o le tulaga tau fanua o loo lisiina atu e le Matagaluega o Punaoa Faalenatura ma le Siosiomaga e fausia fale mautotogi a le Malo. O lea tele se vaega tupe faasai a le Faalapotopotoga e mai nei lisi mo le fausiaina o nisi fale fou ma le toe faaleleia o fale o loo iai ae e leo toe saogalemu.

Tusa o le 24 eka lona aofaiga le tele o le fanua o loo nofo lisi ai le Faalapotopotoga i le Matagaluega o Punaoa Faalenatura ma le Siosiomaga faatasi ai ma le 9 eka o loo taumafai e faasee atu i le Faalapotopotoga mo le fausia o nisi fale nofo e fesoasoani i tupe maua ma le manaomiaaga o tagata o loo tusi talosaga atu.

FAATAMATALAGA O TUPE

O le lipoti faaletausaga 2019/2020 na faamauina ai tupe maua a le Faalapotopotoga e \$8.2 miliona ae \$6 miliona ana tupe faaalu. O le 2020/2021 e \$8.1 miliona tupe maua ae \$6.3 miliona tupe faaalu a le Faalapotopotoga

AOTELEGA O TUPE MAUA MA TUPE FAAALU A LE FAALAPOTOPOTOGA 2019/2020 MA LE 2020/2021

O le tausaga faaletupe 2019/2020 na faamauina ai le tupe maua faasili e 2.1 miliona a le Faalapotopotoga. I le tausaga faaletupe 2020/2021, na siitia le faasiliga o Tupe Maua i le aofaiga e \$212,794 pea faatusatusa i le aofaiga i le aofai e 2.3 miliona o tupe faasili i le 2020/2021 e tusa lea ma le 10% ua siitia ai.

FAUTUAGA

1. E fautuaina e le Komiti le Malo ina ia faataatiaese le faalapotopotoga o Mea Tau Fale a Samoa ma i le totogiina o ni ana tufatufaga poo dividends mo le taimi nei, ona ua matauina e le Komiti le tele o galuega mo ni fale fou e faaoga ai Fanua leo galueina i le taimi nei mo ni tupe maua.

2. E fautuaina e le Komiti le Malo ma le Matagaluega o Tupe ina ia toe iloilo fauga faavae o tupe mo le faamatuina atu o se vaega tupe faaagaga mo le Faalapotopotoga mo l efaatinoia o ana poloketi e ala i le toe faaleleia o ana fale nofo e pei ona matauina i asiasiga a le Komiti iuga fono i le maea ai o iloiloga a le Komiti na faaiugafonoina ai e fautuaina le Fono Aoaoina ina ia faamaonia P.P 2020/2021 Nu.99 Lipoti Faaletausaga a le Faapotopotoga o Mea Tau Fale a Samoa mo le tausaga faaletupe faaiuina le aso 30 Iuni 2020 ma le P.P 2021/2022 Nu.27 Lipoti Faaletausaga a le Faalapotopotoga o Mea Tau Fale a Samoa mo le tausaga faaletupe faaiuina i le aso 30 Iuni 2021.

Ma le faaaloalo lava.

FOFOGA FETALAI : malo saunoa faafetai mole folasaga a lau Afioga i le Taitaifono , ou te tapa lau Afioga i le Sui Minisita o Mea Tau Fale Hon Toeolesulusulu mo le Tali a le tatou Malo.

Afioga Hon TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai ou te tolaulaauina ia Tali a le Malo e faatatau i fautuaga a le Komiti o Tupe Maua ma Tupe Totogi e pei ona folasia manino nei e le Taitaifono. Lau Afioga i le Fofoga Fetalai e muai avatu foi le faafetai ma le faamalo i le Taitaifono aemaise le mamalu o le Komiti tusa o le iloiloga auiliili o le taumafaiga foi a le Pulega o Tatou Fale Totogi.

Tali atu a le Malo i le Lipoti a le Komiti o Tupe Maua ma Tupe Totogi i le P.P 2022/2023 Nu 49 , P.P 2020/2021 Nu 99 ma le P.P 2021/2022 Nu 27 Lipoti Faletausaga a le Faalapotopotoga o Mea Tau Fale a Samoa mo le Tausaga Faaletupe 2019/2020 ma le 2020/2021.

1. FAUTUAGA A LE KOMITI

E fautuaina e le Komiti le faataatiaese o le totogiina o tufatufaga (dividend) mai i le Faalapotopotoga o Mea Tau Fale a Samoa mo le taimi nei, ona e moomia vave e le Faalapotopotoga le faatinoina o ni fale fou mo le lisiina atu .

TALI

Na tuuina mai fale o le Malo i le Faalapotopotoga o Fale i le tausaga 2013 e faatino faapisinisi i auaunaga e aunoa ma se tupe e faatino ai. A leai e ona afaina ai tupe maua ma le manulauti na faatuina ai le Faalapotopotoga i lona tulafono faavae o le fesoasoani i nonogatupe mo e vaivai ia tamaoiga i le fausia o

fale nofo ma faatau fanua umia saoloto mo le siitia o le soifua manuia o ona tagata.

Ua taliaina leni fautuaga maatagofie ina ia faatupeina ai ni fale fou mo le lisiina atu ona ua silia i le 70 tausaga le tuai o fale, e le talafeagai mo le soifua manuia ma taugata le faaleleia.

Ua taliaina le fautuaga a le Komiti o Tupe ma Tupe Totogi .

2. FAUTUAGA A LE KOMITI

Fautuaina le Komiti ma le Malo ma le Matagaluega o Tupe ina ia toe iloilo faiga faavae Tau Tupe mo le faamatuuina atu o se vaegatupe e fesoasoani i le Faalapotopotoga mo le faafouina ma le faaleleia o le tele o ana fale nofo.

TALI

O se fautuaga taua tele leni aua e tatau ona lava se tupe e fesoasoani i le tele o fale e faaleleia, ae le gata i lea o le faatino o nisi o fale fou ma le faalauteleina o le aofai o fale nofo aua le manaomia mai le maketi o fefaatauaiga.

Lau Afioga i le Fofoga Fetalai tuuina atu ma le faaaloalo .

FOFOGA FETALAI: Malo saunoa i lau Afioga i le Minisita, lea foi ua faafofoga le paia o le Maota i Tali manino o le tatou Malo e tusa ai ma sailiiliga ma fautuaga a le komiti o le avanoa leni sei tulai mai lau Afioga i le Taitai o le Itu Agai .

Tofa Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai faafetai mo lou avanoa ua tulai atu ma le faaaloalo lagolagoina ia fautuaga a le Komiti i le tulaga o le fausiaina o nisi falenofo totogi. Ma o la matou fautuaga ia faapena ona tau faanatinati ia feutanaiga ma le MNRE ina ia faamatuu atu le fanua lea, pei ona taua i le lipoti aua le faamoemoe a le Faalapotopotoga o Mea Tau Fale. Faamauina le faafetai i le Afioga i le Taitaifono faapea ia sui o Komiti faatonu a tatou Faalapotopotoga o mea tau Fale mo leni lipoti tele tausaga sa matauina lava e leai se faaletonu, ae faamauina foi e lou sui le faafetai ona e matau atu i le lipoti a le Ofisa Sili o Pulega a le Faalapotopotoga o Mea Tau Fale, le Afioga ia Matautia ua malolo mai lona tofiga. O le mea le faamauina ai le faafetai, faamalo le tautua malo, faamalo le tautua atunuu, tele foi tausaga o tautua le Afioga ia Matautia i lo tatou Malo. Sa amata mai lava i le Faletupe o Atinae i le tele o tausaga sa galulue faatasi ai ma nisi o sui mamalu o le maota, lea ou te matau atu faaauau lea ii i le tatou Faalapotopotoga o Mea Tau Fale. O le mea lea e faamauina ai le faafetai agalelei le Atua laasaga o lea faapena na uia. Ia

faapena ona faatasi le Atua ma faamanuia le Atua i lau faamavaega ma le malologa o le a alo atu i ai. O le matou tala puupuu lea ma le faaaloalo faafetai mo le avanoa.

FOFOGA FETALAI: Malo faafetai saunoa lau Afioga i le Taitia o le Itu Agai, ia tulai mai lau Afioga i le Taitaifono, ia tulai mai le sui o Aleipata Itupa i luga.

Afioga FUAAVA SULUIMALO AMATAGA: Faafetai lau Afioga mo le avanoa, faatopetope atu ia se manatu vaivai o lenei usufono i le tulaga o le lipoti. Ae momoli atu le agaga faafetai i le Taitaifono aemaise foi o le Komiti aemaise foi le Afioga foi i le Minisita, e pei foi ona aumai manino ia Tali a le Malo. E 2 fautuaga ia e aumai ma e lagolagoina foi e lenei itumalo. Pau se manatu vaivai e avatu o le tulaga lea aumai i i faapea o se faafitauli tuga o loo feagai nei tulaga lea ia fanua lisi ia mai i le Matagaluega o le Siosiomaga ma le Punaoa. Ia e pau lava ia le tulaga foi lea e avatu pea faafautuaga, ona o lo o i ai foi le Tulafono o lo o tausua ai e le Matagaluega lea mea tau eleele a le Malo. Ia ae e pei o le Housing, ia o mea lava tau fale. Ia ou te le maua lelei pe ua ia i se latou authority e vaai ai ma mea ia tau aseta o mea tau eleele.

Ae o se fautuaga e tuuina atu, e taumafai pea ia le Pulega o le Housing e negotiate aua o totonu foi o le Matagaluega lea, o lo o iai ituaiga eleele foi ia e eseese le faaaogaina. E iai le commercial use e iai foi ia state use. O le tele e tai pei o le Ofisa o Aoga o Malifa atoa o lo o lisi ia le Matagaluega atoa i le eleele lea i le MNRE. E pei lava e \$1 i le eka, ia e na o se mea foi lea e faatulaga ai ia o lo o iai eleele ia, ao lo o lesitala pea i lalo o le Tulafono a le Siosiomaga ma le Punaoa Faalenatura.

Ae o le tulaga na e mafai lava ae ese foi le rate e avse i isi Faalapotopotoga ma Matagaluega o la e faaaoga le commercial use. O le mea foi faapea o la e tele ia le revenue e maua mai, ona e iai foi ia tulaga la e saili mai foi le share latou a le Matagaluega, e iai foi le latou revenue e generate, e ave foi i totonu o le Malo.

Ae pei o se mea foi lea e pei o se fautuaga e fetuutuunai. E mafai lava ona faapea, pe tau pau mai ia le lisi lea e lisi ai i i le Housing instead foi lea aua a toe avatu foi lea, ia e pau lava le mea e iai foi ia fesuaiga i totonu o Tulafono ina ia... e fautuaina e le matou itumalo, ia taatia pea i lalo o le Matagaluega o le Siosiomaga ma Punaoa o lo o gafa ma le Tulafono lea, ae mafai lava ona negotiate e tau tuutuu i lalo, ona o lea foi e naunau le Faalapotopotoga, ia tau siisii i luga ia le latou revenue ina ia mafai ona faatino ia nisi tatou state housing ia ia aua le mamalu o le atunuu.

Ia ma e fia faamauina foi le faafetai i le Pulega, aemaise foi ia le Tamaitai Pule le afioga Matautia. O lea e matau atu i tausaga ia e 2, ia o lo o aeae pea i luga ia le Tupe Maua, lea sa \$2.1 million 2019/2020, ia e oo mai i le 2020/2021, ia ua toe sii foi i luga, \$2.3 miliona. Ia ma o foliga

vaaia ia, ia o le lelei ona faatino galuega ma e momoli atu ai le agaga faafetai i le Tamaitai Pule ma le Pulega, ia aemaise foi o le Taitaifono ma le Komiti Faatonu ia ma afioga foi i Minisita, sa faapea ona latou galulue ia aua le taupati mai foi ia o le tulaga o le tatou Faalapotopotoga lea o le tulaga tau fale. Ia ma le agaga faaaloalo, faafetai.

FOFOGA FETALAI: Malo faafetai...

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai....

FOFOGA FETALAI: Ia tulai mai lau afioga i le sui usufono mamalu o Vaimauga Nu.1.

Afioga SULAMANAIA FETAIAI TAUILILI TUIVASA: O le itumalo lenei e faataua ia o nei Lipoti. E momoli ai le agaga faafetai i le afioga i le Minisita faapea foi ia le Taitaifono ma le Komiti aemaise foi afioga i le Laumea foi po o le afioga i le faletua sa tulai mai.

Ae o le... e vave lava se manatu o lenei itumalo i fautuaga a le Komiti ia e pei o lea e matau atu o lea e lilifa le finagalo o le Komiti e faataatia ese ia le tulaga lea i le Matagaluega o Fale i le dividends. Ae sa iai lava ia le manatu e aumai pea i totonu aua e tasi lava ia le taga lea e aumai ai, e aumai i tonu toe avatu i fafo.

O le lona 2 o manatu o lenei itumalo o lea e vaai atu pei e fia vaai foi ia lenei itumalo po o a ni aitalafu? Ona o lea e aumai e na o Tupe Maua, Tupe Maua, ia po o le a le tulaga o iai aua o i i lenei foi itutino o le Malo o tua ai o tatou tagata limavaivai i tulaga tau loans. Ia po o lelei ia le tologiina o aitalafu? Ia e pei e pau lava na o tulaga e fia manino ai ia lenei itumalo i tulaga faapena i le tatou Matagaluega. Ae manuia tele lau afioga i le Taitaifono ma le Komiti aemaise le afioga i le Minisita e ona le Tulafono.

FOFOGA FETALAI: Ia, malo faafetai. Ia tulai mai lau afioga i le Taitaifono, matau atu e leai se isi sui usufono e fia saunoa.

Afioga FALEOMAVEGA TITIMAEA TAFUA: E momoli atu le faamalo ma le faafetai tele. Faafetai i lau afioga i le Fofoga Fetalai mo le avanoa. E muamua ona momoli atu le faamalo ma le faafetai tele i lau afioga i le Taitai o le Itu Agai e tusa o fautuaga. Ia faapena foi le faafetai e molia i le afioga i le Tamaitai Pule, malo faafetai lava.

Ia momoli atu foi le faamalo i fautuaga Fuaava, ia o lo o faapena lava ona tilotilo le Pulega o le tatou MNRE ia o lo o iai Faiga Faavae e faatino ai vaega uma e pei ona e taua.

Lau... Sulamanaia, malo faafetai mo le fesili. E silafia foi, afai e iai le Tupe Mama, lona uiga e leai se aitalafu. E silafia e lau afioga e... faafetai

le lagalaga i mea lelei. E lelei lava le saoga lea e iloa ai le sui usufono mataaala, e fia malamalama uma i vaega e 2. E le na o le agavale e tatau foi ona iloa le taumatau. Malo faafetai tele. Ae na o si faamalamalama lenei, e le mafai na... e le o iai se aitalafu ia o lo o iai Tupe Mama a le tatou Matagaluega.

Ia avea ai lea o lenei avanoa lau afioga Matautia, afioga i le Saopapa, ia malo le galue, galulue e tusa o la outou Matagaluega. Ia o lea foi faatoa maua nei ia, o lea ua faamavae ia lau afioga, ia e mulimulitai lava ia faamanuiaga i le galuega na e faatinoina i nei tausaga e tele. Ia malo faafetai, e momoli foi le faamalo ma le faafetai i le o le a tofia e tauaveina lenei Matagaluega taua i si o tatou atunuu.

Ia lenei foi avanoa e momoli atu ai le faafetai tele i lau afioga i le Fofoga Fetalai, ae a le afioga i le Failautusi o le Fono ma le mamalu o le Ofisa o le Palemene nei i le tautuaina o le Fonousu a Samoa, faamalo faafetai tele. Faafetai faapitoa i le Failautusi o lo o faapena ona lagolago mai i lenei Matagaluega i mea tau Komiti, lau afioga Lemalu Ruta, malo faafetai faapea foi ma Fausaga Afaese. O latou lava nei o lo o feagai aemaise le mamalu o lenei o latou o lo o lagolagoina ia Komiti Faa-Palemene, malo faafetai tele. Ia o le tala lava ia, o tou galuega, e faapena ona iai lava ia le faamanuiaga a le Atua ia outou taitoatasi.

Ia lau afioga i le Fofoga Fetalai, faafetai tele mo le avanoa, manuia tele ia le tatou Fono.

FOFOGA FETALAI: Malo saunoa i lau afioga i le Taitaifono...

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai pe maua se avanoa...

FOFOGA FETALAI: Ia, pe iai se mea o totoe, ia saunoa ia lau afioga i le sui usufono mamalu o Vaimauga Nu.1...

Afioga SULAMANAIA FETAIAI TAUILILI TUIVASA: Leaga o lea e faafofoga le atunuu i le saunoaga a le Taitaifono, e le i tali mai lava i le tulaga o lau fesili. E pei o le uiga o lau tala o lea ua faafofoga le atunuu e leai ni aitalafu. Ia e pei o le agaga lenei o lea e ta te fiafia ai, o e uma o lea e iai ni aitalafu i lea Faalapotopotoga, ia o lea ua kilia atoa. O lea ua saunoa le Taitaifono i le Maota lenei.

E pei o le agaga lenei sa avatu ai o lona uiga e leai ma se isi o toe iai sana arrears o le Ofisa o Fale ma... Ia e pei o le agaga lenei e faafetai ai i le afioga i le Taitaifono i le mataala ma le alofa i le atunuu lau afioga i le Fofoga Fetalai.

FOFOGA FETALAI: Ia a fai lava o lenei ua e silafia ua leai se tala o aitalafu, ia o lona uiga o la e manuia ia le Faalapotopotoga. Ia se i tulai mail au afioga i le Minisita mo le saunoaga foi i nisi o mataupu sa laga.

Afioga Hon TOEOLESULUSULU CEDRIC POSE SALESA SCHUSTER: Faafetai lau afioga i le Fofoga Fetalai, faafetai atu foi i sui usufono na faaali finagalo, nisi foi o fautuaga o le a silasila iai le Matagaluega ma le Pulega aua foi le alualu i luma ma le faaatoatoaina foi o lana tautua aua se lumanai o Samoa.

E na o ni nai vaega lava ia e fia fesoasoani atu ai, e tusa ai o vaega o eleele e pei ona taua e se tasi o sui usufono o le tatou Maota, ia e talitonu o le vaega lea e le i iai se Tali a le tatou Malo, ona e le i sau faapatino mai ai se fautuaga a le Komiti. E talitonu foi la, o lea na silasila iai le Komiti ma o lea na pei e faaali ai le finagalo o le afioga i le Taitaifono, ia o vaega ia o lo o galulue faatasi iai ia le Pulega, ia aemaise foi ia le Matagaluega o Siosiomaga ma Punaoa.

Ia lau afioga ia ona muliai lea o se faamatalaga, e pei ona saunoa ia le afioga i le Taitai o le Itu Agai. Ia e momoli ai foi le agaga faafetai o le Pulega, aemaise ai foi o le tatou Malo i le tautua matavela a le tina ia Sua Rula Levi. Le afioga i le Tama a le Fale, ia o se tasi foi o lenei afioaga ua leva lana tautua i totonu o le tatou Pulega. Ma e pei ona matauina, ia ua tele le aoga ma le alualu i luma o lenei Pulega foi.

Ia e talitonu le agaga ia faapea ona fesoasoani ia le Agaga o le Atua i fuafuaga a lenei tina aua le alualu i luma ona o lea ua faamavae aloaia mai foi. O le fuafuaga lava ia e ao ona faaali pea se agaga faafetai o le tatou Malo, e tusa ai o latou o lo o faapea ona tautua aua se lumanai manuia o le tatou atunuu. E faaiu ai lea ma se tala lau afioga i le Fofoga Fetalai, faafetai atu i le tatou Maota nei e tusa ai ma finagalo aemaise foi o le Komiti, soifua.

FOFOGA FETALAI: Malo saunoa i lau afioga i le Minisita. Tulai mai lau afioga i le Taitaifono mo le lafo.

Afioga FALEOMAVAEGA TITIMAEA TAFUA: Lau afioga i le Fofoga Fetalai, ou te faatu le lafo, *Ina ia faamaonia e le Fono Aoao P.P. 2022/2023 Nu.49, Lipoti a le Komiti o Tupe Maua ma Tupe Totogi i le P.P. 2020/2021 Nu.99 ma le P.P. 2021/2022 Nu.27, Lipoti Faaletausaga a le Faalapotopotoga o Mea Tau Fale a Samoa mo Tausaga Faaletupe 2019/2020 ma le 2020/2021.*

Faaluaina e le sui usufono mamalu mai Lefaga ma Faleaseela, sui usufono mai Safata 2 ma le sui usufono mo Aana Alofi 1.

Na faamaonia le lafo.

FOFOGA FETALAI: Ou te tapa lau afioga i le Sui Minisita mo le Lafo mo le Tali a le Malo.

Afioga Hon TOEOLESULUSULU CEDRIC POSE SALESA SCHUSTER: Lau afioga i le Fofoga Fetalai, ou te faatu le lafo, *Ina ia faamaonia e le Fono Aoaio Tali a le Malo i Fautuaga a le Komiti o Tupe Maua ma Tupe Totogi, e pei ona ou tolaulauina.*

Faaluaina e le Minisita mo Fesootaiga ma Faamatalaga Tekonolosi, ma le Minisita mo Leoleo ma Falepuipui, Pulega o Tinei Mu ma Faalavelave Tutupu Faafuasei.
Na faamaonia le Tali a le Malo.

P.P.2022/2023 NU.51, LIPOTI A LE KOMITI O LE VAEGA TAU TAMAOAIGA I LE P.P.2020/2021 NU.111, LIPOTI FAALETAUSAGA A LE MATAGLUEGA O MATAUPU TAU LE VA I FAFO MA FEFAATAUAIGA MO LE TAUSAGA FAALETUPE 2019/2020

P.P.2022/2023, NU.135, TALI A LE MALO I LE P.P. 2022/2023 NU.51, LIPOTI A LE KOMITI O LE VAEGA TAU LE TAMAOAIGA I LE P.P.2020/2021 NU.111, LIPOTI FAALETAUSAGA A LE MATAGALUEGA O MATAUPU TAU LE VA I FAFO MA FEFAATAUAIGA MO LE TAUSAGA FAALETUPE 2019/2020 - ILOILOGA

FOFOGA FETALAI: Tulai mai lau afioga i le Taitaifono o le Komiti o le Vaega Tau le Tamaoaiga.

Afioga NIUAVA ETI L MALOLO: Lau afioga i le Fofoga Fetalai, ou te faatu le lafo, *Ina ia faautagia e le Fono Aoaio le Lipoti a le Komiti o le Vaega Tau i le Tamaoaiga, o lo o tuuina atu ai ana Sailiiliga, Fautuaga ma Iugafono.*

Faaluaina e le Sui usufono mamalu mai Gagaemauga Nu.2 ma le sui usufono o Falealili Nu.2.

Na faamaonia le lafo.

FOFOGA FETALAI: Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga NIUAVA ETI L MALOLO: Lau afioga i le Fofoga Fetalai, manatu e le toe aufanaina le laau ua maea ona ta tulaga aua paia ma sa o le Palemene o Samoa. Ae ou te faapoipoi vagana vaeane le faafofoga tapuai o Samoa, ou te tulai ai ma le agaga faaaloalo e faaleoina le Lipoti a le Komiti o le Vaega Tau le Tamaoaiga i le Pepa a le Palemene;

P.P. 2022/2023 Nu.51, Lipoti a le Komiti o Vaega Tau Tamaoaiga i le P.P. 2020/2021 Nu.111, Lipoti Faaletausaga a le Matagaluega o Mataupu Tau le Va i Fafu ma Fefaatauaiga mo le Tausaga Faaletupe 2019/2020;

Lau afioga i le Fofoga Fetalai o le Aso 2 o Mati 2022, sa iloiloaina ai e le Komiti le Lipoti Faaletausaga a le Matagaluega o le Va i Fafu. I tualumaga a le Komiti na faamauina ai, le faamanuiaina ai o nisi o sui o le Matagaluega i avanoa faigaluega e fai ma sui o Samoa i atunuu mamao. O se taimi muamua ua mafai ai ona agavaa nisi, o lo o galulue i le Matagaluega i ia avanoa, ma e faafetai ai pea e le Komiti ia le maelega ma le soifua tautua o le afaigaluega.

Ua auiliili atu i lena Lipoti galuega tetele na mafai ona ausia e le Matagaluega i le Tausaga Faaletupe Iloiloaina. O nei taumafaiga uma, o le faamoemoeaga autu, ina ia ausia fuafuaga alualu mamao, ma manulauti faataatitia a le Matagaluega.

Aotelega o Saililiga o Matafaioi ausia;

1. Faamautuina o maliega Faava-o-Malo, ma le atinaeina o fefaatauaiga, i le va ma atunuu mai i fafu.

O le Tausaga Faaletupe na iloiloaina, na faamauina ai nisi o talanoaga tetele, sa faatautaia aua le faamautuina o maliega Faava-o-Malo mo le atinaeina o va lelei ma atunuu i fafu faatasi ai ma fefaatauaiga.

O ia faatalanoaga, e aofia ai fuafuaga faafouina a Niu Sila ma le Pasefika le Waitangi, o i ina na faavae mai ai le faavaa o faigapaaga a Samoa ma Niu Sila. O fuafuaga maualuluga a Ausetalia, na faatautaia i Canberra, faataunuina o faatalanoaga ma le Iuni a Europa i Peleseuma Brussel, faamaoniaina o faapaaga a Samoa ma Peretania, ina ua tuua e Peretania le Iuni a Europa ma le faamautuina o maliega mo fefaatauaiga o sootaga vavalalata o le Tamaoaiga o le Pasefika, PACER PLUS.

2. Mataituina o sootaga va lelei o Samoa ma atunuu mamao.

E tele ni fonotaga na mafai ona talimalo ai Samoa, e le gata i fonotaga a le itulagi, faapea ma fonotaga Faava-o-Malo. O nei fonotaga e aofia ai fonotaga Faaletausaga a le Failautusi a le Pasefika mo Polokalame o le Siosiomaga a le Itulagi, Secretariat of the Pacific Regional Environment Programme (SPREP), na Taitaifono ai Samoa.

Fonotaga a Faigafaiva mai le Keripiane, Aferika ma le Pasefika, African Caribbean Pacific po o le ACP.

Fonotaga a le Pasefika i Malosiaga Tau Eletise ma Femalagaiga.

Fonotaga a Saina ma le Pasefika i Mataupu tau i le Tamaoaiga.

Fonotaga a Minisita o Taaloga ma Taaloga a le Pasefika.

Fonotaga a le Komiti o Aiatatau a le Fanau.
Fonotaga o le Saogalemu ma le Nofu lelei o Tamaitai.

O le taua o nei Fonotaga, e le gatae fesoasoani i le siitia o le tamaoaiga i usufono o lo o malaga mai, ae o se avanoa lelei foi, e auai ai le toatele o i latou o lo o fai ma sui o si o tatou atunuu, e faaleo ia o tatou manaoga i mataupu talanoaina, o ia fono taga.

O le fonotaga a le Komiti o le Aiatatau o le fanau, na faia mai i Samoa, o se fonotaga muamua lea a le Komiti ua talimalo ai se atunuu o le Pasefika, e ese mai i le nofoaga na masani ona faatino ai i Sineva. Na faamauina le agaga faafetai o sui auai o lenei fonotaga, ona o le lava tapena o le fanau aoga. Ae e le gata i lea, o le oa o mafaufauga, na faaalua e le fanau, na fai ma sui o Samoa, i lea fonotaga.

O le fonotaga mo le saogalemu, ma le nofo lelei o Tamaitai, sa taulamua ai ia le Matagaluega o Leoleo. O se avanoa lelei na maua e Tamaitai Leoleo o le Matagaluega, e faafesoai ai ma sui auai o isi atunuu, i auala e faaleleia ai faatinoga, o a latou auaunaga. O le Matagaluega na feagai ma le faatulagaga, o le afaigaluega o i latou e 45 mai i atunuu tuaoi, e 15 na fesoasoani mai i le tulaga pagatia na iai Samoa, i le faamai o le misela. O le Matagaluega foi, na feagai ma le tuufaatasia o le Liopti na tuuina mai i le Palemene.

3. Tapenaina o avanoa taua ma le talafeagai e auai ai i Fonotaga e fai ma sui o Samoa.

E tele ni avanoa na mafai ai ona faimalaga atu ai Minisita, faapea sui taitasi o le Malo, e fai ma sui o le atunuu i fonotaga ma avanoa faale-aoaoga i atunuu o lo o galulue faipaaga faatasi. O le naunautaiga lava, o le fefaasoai o manatu, ma faatinoga aua le faaleleia o le ofoina atu, o le auaunaga mo si o tatou atunuu.

Na maua le avanoa e Malaga atu ai le sa avea ma Palemia, ma lana aumalaga i Tuvalu, mo le fonotaga a Taitai o le Pasefika lea na talia ai ma le tautinoga o le POE i mataupu tau saogalemu, na auai atu ai foi Samoa i le Fonotaga faaitulagi, i mataupu e tetee atu ai i mataupu faaalatua, ma le fonotaga a le Pasefika ma Isaraelu, sa faia uma i Fiti.

4. Sao ma avanoa o Ofisa a Samoa i atunuu e mamao.

Na faamauina le tele o le sao o Faauluuluga o tatou Ofisa o i atunuu e mamao i matafaioi tauave a le Matagaluega, aemaise lava o piriota na iloiloaina.

E ui i aafiaga o fesoataiga, i le taofia ai o femalagaiga a vaalele ona o le Koviti-19, peitai na maua lava le avanoa, e faaoo ai pea

le leo o Samoa, i fonotaga ma mataupu talanoaina i nuu mamao, e tauala atu i ai latou nei. Na faamauina e le Komiti le siitia o le numera o Ofisa o Samoa e faatuina i atunuu e mamao, pe a fua i faamatalaga o tupe sa mafai ona tuuina mai.

Na faamauina foi e le Komiti le faamanuiaina ai o nisi o le afaigaluega a le Matagaluega, i avanoa e avea ai ma Faauluuluga o Ofisa a le Malo i fafo. O ni avanoa taua, ma o se taimi muamua ua faamanuiaina ai ni sui o le Matagaluega.

5. Mataituina o Avanoa Faasikolasipi ma Aoaoga Tau Pulega.

O lo o faailoa manino e le Lipoti, sa iloiloaina le faaauau pea o felafolafoaiga ma faatalatalanoaga a Samoa ma atunuu o lo o faipaaga faatasi e ala i avanoa sikolasipi, ma aoaoga e le gata i atunuu mamao, ae faapea lava i totonu o le atunuu.

Na faia le fonotaga ma sui o Niu Sila, Ausetalia e faamautu ai maliega o fesoasoani mo galuega faataatitia mai i totonu o taiala mo le atinae o Samoa, Strategy for the Development of Samoa, ma galuega o lo o manaomia ai le tomai faapitoa. O le taua o nei avanoa, e le gata e siitia ai le silafia o le afaigaluega, i fonotaga o lo o auai atu ai, ae ua maua ai foi le agavaa, e mafai ai ona siitia tulaga faigaluega, e le gata i totonu o le Matagaluega, ae faapea foi i atunuu e mamao.

Na faamauina e le Komiti le galuega fita na faafeagai ma le Matagaluega, le faamautinoaina o le malupuipua o soifua o tamafanau na aumau i atunuu mamao, mo aoga faasikolasipi. E le i mafai ona taliu mai i Samoa ona o le faamai o le Koviti-19.

6. Faafoeina lelei ma le faatautaia o mataupu tau le fefaatauaiga.

Na auai atu Samoa mo le taimi muamua i le fonotaga a le Komiti mo le feagaiga mo le fefaatauaiga ma le Iuni a Europa, sa faia i Suva i le 2019. Sa maua ai ma le avanoa, e fono ai le auusufono mai i Samoa ma sui o le Iuni a Europa, i se fonotaga faapaaga ma talanoaina ai vaega e ave iai le faamuamua, ina ia maua ni faamanuiaga mo Samoa.

Na faamauina ua toa 6 atunuu o le Pasefika ua sainsi lima mo le feagaiga i le Sootaga Vavalalata o le Tamaoaiga o le Pasefika o le PACER PLUS. Ma na faamauina, e toe toa 2 ni atunuu, ona faatoa mafai lea ona faamamaluina lea feagaiga aua le mataituina le o faatinoga o le fefaatauaiga.

O le Tausaga Faaletupe foi o lo o iloilona, na tuuina atu ai le tauofoga a Samoa e faatuina ai le Ofisa o le PACER PLUS i Samoa nei. O lenei faamoemoe, o se galuega taua tele e le gata mo le Malo ae faapea foi tagatanuu e ala i le siitia o avanoa mo fefaatauaiga talafeagai, ma le gafataulimaina i totonu o le atunuu.

Lau afioga i le Fofoga Fetalai, o fautuaga, i le maea ai o iloiloga a le Komiti, e fautuaina le Malo, ina ia mataituina ia le tapenaina o ana Lipoti Faaletausaga, o lo o tuuina mai mo le Iloiloga a le Palemene. E le i mafai e le Komiti ona faamaonia le auiliilina o faamatalaga o tupe a le Matagaluega sa tuuina mai ona o le leai o se faamatalaga o tupe mai i le Matagaluega o Tupe, e faamaonia ai le faagaioina o Vaegatupe faatatauina a le Matagaluega.

E ui o se vaega o lo o matauina o lo o iai se feteenaiga faaletulafono o lona faatinoina, ae e manatu le Komiti, e ao pea i le Matagaluega ona faamautinoa e mafai ona tali atu i nei manaoga taua i le taimi e faatino ai iloiloga, a le Komiti i luga o ana galuega o lo o faatino.

Ia ona oo mai lea i vaega o Iugafono lau afioga i le Fofoga Fetalai, i le maea ai o iloiloga a le Komiti, na faaiugafonoina ai e fautuaina le Fono Aoa, ina ia faamaonia le P.P. 2020/2021 Nu.111, Lipoti Faaletausaga a le Matagaluega o le Va i Fafu ma Fefaatauaiga 2019/2020, ma le faaaloalo tele lau afioga i le Fofoga Fetalai.

FOFOGA FETALAI: Malo i lau afioga i le Taitaifono, tapa lau afioga i le Sui Palemia, Sui Minisita foi o le tatou Matagaluega o le Va i Fafu, mo le tali a le tatou Malo.

Afioga Hon TUALA TEVAGA IOSEFO PONIFASIO: Lau afioga i le Fofoga Fetalai, ou te tolaulauina Tali a le Malo e faatatau i fautuaga a le Komiti o le Vaega Tau i le Tamaoaiga e pei ona folasia manino nei e le Taitaifono.

Lau afioga i le Fofoga Fetalai, e na o le tasi lava ia le fautuaga na tuuina mai, lea na faatuina atu e le Taitaifono. O le tali o le fautuaga ua tuuina mai, ua talia ma le faafetai le fautuaga e pei ona tuuina mai. E faailoa atu ma le faaaloalo e tusa ai ma le faatalatalanoaga o le Lipoti Faaletausaga 2019/2020 o le Matagaluega o le Aso 2 o Mati 2022, sa tuuina atu ai loa e le Matagaluega le Tusi Faamaonia le faamatalaga o Tupe Maua ma Tupe Faaalu mai i le Matagaluega o Tupe ma sa taulimaina e le Failautusi o le Fono i le Aso 30 o Mati 2022 i le vaitau lea o le vavao o le Koviti-19. Ua toe faapipiina atu foi ia lenei Tusi Faamaonia mo le silafia.

Lau Afioga i le Fofoga Fetalai ua faamalieina le fautuaga e pei ona tuuina mai e le Komiti ma le Taitaifono.

FOFOGA FETALAI: Malo, faafetai saunoa i lau afioga i le Sui Palemia, ia o le Sui Minisita foi o le tatou Matagaluega o le Va i Fafu. Ia o lea foi ua faafogafoga ia le tatou Maota i le Lipoti a le Taitaifono. Ia o le avanoa lenei i se tasi o sui usufono ia... se i tulai mai lau afioga i le sui usufono mamalu, Aana Alofi Nu.2.

Afioga AIONO TILE GAFA (Aana Alofi 2): Faafetai i lau afioga i le Fofoga Fetalai mo le avanoa, tele lava Lipoti a le matou Komiti. Saili

le avanoa faafetai o lea ua maua le avanoa e fai ai se manatu aua le Lipoti a le Komiti o le Vaega Tau i le Tamaoaiga.

Talofa ua faaaaogagase lau afioga ma le Palemene, ae malo lava le onosai tautuaina o le atunuu o tatou tofi ma o tatou tiute. Ae o la a le aposetolo, a ou vaivai ona ou malosi ai lea. Malo le onosai i lau afioga ma le paia o le Maota. E laitiiti lava sina vaega.

E faafetai muamua atu lava i le galuega a le Komiti ia aemaise foi ia le Matagaluega ma le Lipoti e pei ona taatia nei i le Maota. O si vaega laitiiti lava lea lau afioga i le Fofoga Fetalai, lau afioga i le Taitaifono o le tulaga lea o tatou tagata faigaluega, lea o lo o galulue nei i fafo o le fia malamalama, aua o lea e pei e tuuina mai ia le tulaga lea o le tau faatumuina o avanoa ia, latou e filifilia e le Matagaluega e o e tautua ia o tatou Ofisa i fafo. E le gata i Ofisa Sili o Pulega o tatou Ofisa i Fafo, ia e iai foi sui e o e avea ma Failautusi e latou te lagolagosua i le galuega.

E talitonu lau afioga i le Fofoga Fetalai, o avanoa la ia e pei ona aumai i le finagalo o le Lipoti a le Komiti, i le faafaigata ona faatumuina. O le fesili la lena o lea e fia malamalama, ioe, pe a fai e o nei ia tatou sui ia, ou te talitonu e le tumau ai. E iai taimi e tapulaa e avanoa e toe foi mai ai. Ae o le toe foi mai i lo tatou atunuu, pe o maua pea la ni o latou avanoa i totonu o le Matagaluega aua o lea e tausaili nisi e faatutumu avanoa ia.

O lona uiga po o le a le umi o le taimi e Malaga ese atu ai, o lona uiga e foi mai ua faigaluega nisi i o latou avanoa. Ae e pei o le fesili lena e fia malamalama ai lau afioga, lona uiga e foi mai pe faafefea lea. Pe toe maua ni o latou avanoa i totonu o le tatou Matagaluega? Ia pe alu loa e sue se isi galuega. E pau lava na o se faafesili i lau afioga, ae faafetai tele mo le avanoa, manuia.

FOFOGA FETALAI: Malo, faafetai. Ia...

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai....

FOFOGA FETALAI: Ia tulai mai lau afioga i le sui usufono mamalu o Vaimauga Nu.1.

Afioga SULAMANAIA FETAIAI TAUILILI TUIVASA: Ia o le agaga faafetai i le Taitaifono ona ua aumai foi le Lipoti a lena foi vaega taua o le tatou Malo i lalo o le afioga i le Palemia ma le Sui Palemia.

A o le faanoanoaga o lou nei sui usufono ona e pei e matau e le i maea ona tapena le Lipoti. A faitau foi maeaea i fautuaga ia e aumai, e tele lava le tuuaiga lea e fai mai e le i maua le tulaga i le Tala i le Tupe. E le i mafai e le Komiti ona faamaonia le auiliilina o faamatalaga o Tupe a le Matagaluega tuuina mai ona o le leai o se faamatalaga o Tupe, e pei o le agaga lena e tau faanoanoa ai le sui usufono, ona o lea e le i maea le latou fuafuaga ae o lea ua aumai. Ae e pei o le agaga lena leaga e tele lea

tuuāiga ma lea foi tulaga i le Lipoti. Ae sa tatau la ona toe tuu se i avatu la le mea lea o lea ua aumai lea ua tatou iai nei i le Maota lea ua saunoa le Sui Palemia, ia ona iai lea o le fuafuaga.

Ia e pei o le tuualalo lena a lenei itumalo i le tapenaina ma le aumai i totonu, o lea la e iloa e le i avatu le Tala o le Tupe ae aumai lava la i totonu o le Maota lenei le latou Lipoti? O mea taua na e silasila iai mea nei o Komiti. Tala o le Tupe faamaumauga, faaaluina o Tupe Maua a lea Matagaluega po o lea Faalapotopotoga a le Malo. Ae a o lea e matau, e aumai e le i silasila le Komiti i se Tala o le Tupe ona fai mai se i sui le Tulafono. Ia ae silasila o Matagaluega uma a le Malo e alu uma i lalo o le Treasury, ae pei o le agaga lena e avatu ai se tuualalo i le Komiti mo le agai i luma.

Ae ua talia e le sui usufono lenei lea ua malele le afioga i le Sui Palemia i tulaga ia sa popoe iai le Komiti, ia o lea ua aumai e le sui o le Treasury ia le faamaumauga, lea ua iai i le Maota le Tala o le Tupe a le Foreign Affairs, ma lou agaga faaloalo lau afioga i le Fofoga Fetalai.

FOFOGA FETALAI: Malo, faafetai, malo foi le faasoā. Ia tulai mai lau afioga i le Taitaifono se i tali le fesili.

Afioga NIUAVA ETI L. MALOLO: Faafetai i lau afioga i le Fofoga Fetalai, o le a ou tali solomuli atu i le finagalo lona 2, ia ona ou agai atu ai lea i le finagalo muamua. Ia masalo o lea na toe tali lava ia le sui usufono mamalu i lana fesili. O le tulaga lea e lipoti mai i i mo le Audit Report. Silasila foi lau afioga i le Fofoga Fetalai, e eseese le treat ina o SOEs ma Matagaluega a le Malo.

O Matagaluega a le Malo e tasi le taimi e audit ai aua e tasi ia le pool of money. O la e i o i le Ministry of Finance e audit ai. O le atugaluga lena o lea e i totonu o galuega a le Komiti. E iai Matagaluega e oo mai i le taimi e iloiloina ai le latou Lipoti Faaletausaga, e le i oo mai ia se Audit Report. A o le Audit Report o la ua i totonu o le Ministry of Finance. O le latou galuega e pei ona fautua mai ia le Ofisa o le Audit, e tatau ona aumai le pepa la e i o e faapipii mai i le Lipoti.

O le ala lena a outou silasila nei i le fautuaga lea e iai, e pei o le faigata lena o lo o taoto ai galuega a le Matagaluega. E le pei la o SOEs taitasi, ua fai lava ia latou pool of money so they have to audit their own money. E le pei la o Matagaluega ia a le Malo, e tasi lava le taimi e audit uma ai. E pei o le agaga lena e pei ona aumai foi le faafesili, e pei o le tulaga tonu lena na ala ai ona oo atu i le taimi lea, o le faamatalaga na aumai ua uma ona audit, ae e le i oo mai se Lipoti i le Matagaluega e pei ona fitoitonu ai le vaega lea.

O le faafesili a le afioga ia Aiono, masalo Aiono e silafia e pei o le tulaga lea, o le atugaluga e tasi lea luitau i totonu o le Lipoti lea e pei ona iloiloina. O le tulaga lea e pei o le faatumuina o avanoa ia i atunuu i fafo.

E le gata o le feagai ai o le atunuu i lena foi vaiata ma tulaga i faamai ma mea faapena, ia a o nisi foi o atugaluga e pei ona molimauina.

O le tulaga ia i le faatumuina o avanoa nei, ma le toe foi mai, e silafia uma e le Palemene le mea lena o lo o fitoitonu i le Kapeneta i le tulaga i le filifiliina o ana sui i totonu o Ofisa ia. E pei ona iai i atunuu i fafo aua le atunuu. Ia o se taumafai lea e tali atu ae faafetai tele mo le faafesili e pei ona aumai i le afioga i sui usufono mamalu. Ma lou faaaloalo tele.

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai, e le logomalie i le sui usufono o Vaimauga le saunoaga a le Taitaifono. E le solomua i ni tagata ua Taitaifono ia ni saunoaga e tali solomuli. Ia o ai oe e te tali solomuli ai i le Vaimauga?

O le sui usufono lena ua leva ona galue i totonu o Matagaluga a le Malo. E malamalama lelei, o le uiga o lau tala, a silasila lelei lava i le Lipoti lea e aumai e le i silasila i le tulaga o le Tala o le Tupe. O la e malamalama uma e tasi lava le mea e sau ai, e tasi lava le faamalu o lalo o le Treasury Department a le Malo. Ou te le o talanoa atu o le Foreign Affairs o le mea a le Malo. O le agaga lena o lea ou te fai atu ai lau afioga ae aveese ia saunoaga ia. E le logomalie aemaise o le Taitaifono o Komiti ua ave iai ia faatuatuaga, ae e le logomalie i le sui usufono o Vaimauga e sili atu ona malamalama i totonu o le tulaga tau i le Public Service le sui usufono lena e te le iloa iai. Ma le agaga faaaloalo lau afioga i le Fofoga Fetalai.

FOFOGA FETALAI: Ia malo faafetai, ia e fautua atu foi i tatou sui usufono, ina ia tausolomua foi ia outou afioga i Taitaifono, ia ona ave foi le faaaloalo i sui usufono o le Palemene, ia o lo o sausaunoa ia aua ia le tatou Lipoti ma tatou mataupu.

Ia se i tulai mai ia le Taitaifono.

Afioga NIUAVA ETI L. MALOLO: Lau afioga i le Fofoga Fetalai, o le sui usufono lena e faaaloalo tele ia i e foi na mua i malae i le Palemene. Ae masalo e le o maua lelei mai e le afioga i le sui usufono mamalu, o le uiga o lau tala o lea o le a ou amata atu i le lona 2, ona ou agai lea i le Numera 1.

Ia e faamalulu atu i le afioga i le sui usufono mamalu, ia pe a faapea e ese foi lau faitau. Ae leai o le ta vanonofo, ou te iloa lelei tosi lo ta va, ou te faaaloalo ia te oe, o oe o le tasi o ulusina o le Palemene lena. Ma lou faaaloalo lava, faafetai.

Tofa Hon Olo Fiti Afoa Vaai: Lau afioga...

FOFOGA FETALAI: Ia se i tulai mai lau afioga i le Minisita o Galuga...

Tofa Hon Olo Fiti Afoa Vaai: E na o si mea puupuu lava lea lau afioga ne i matau mai le atunuu, faapea o lea faatoa tulai mai lea o le tulaga lea o le le aumaia o Tala o le Tupe a Matagaluega a le Malo i Lipoti ia. Ua leva, sa iai foi le tulaga sa faasea ai foi ia matou nei, i le tulaga lea o le le aumaia i totonu o Lipoti a Matagaluega taitasi, ae o le tali lava e ta aofai mai lava i lalo o le Lipoti a le Ofisa o Tupe. I nei mea ane ua faapea mai le atunuu, ai o le a fai faapea e leai ni Tala o Tupe e aumaia i Lipoti a Matagaluega.

E pei o le faiga lena, atonu e iai foi se isi taimi, ia tatou talanoa e tau sui laitiiti. Ia ma le faaaloalo lau afioga.

FOFOGA FETALAI: Malo, faafetai, atonu o lea ua saunoa manino lea afioga i le Minisita, e tusa foi ma le tau faamalamalamaina i le afioga i le Taitaifono ia le tulaga o Matagaluega a le Malo, o lo o i lalo uma o le faamalu a le Faletupe. O le mea lea malo faafetai.

Tapa lau afioga i le Sui Palemia pe iai se mea e te saunoa ai i le mataupu sa laga.

Afioga Hon TUALA TEVAGA IOSEFO PONIFASIO: Lau afioga i le Fofoga Fetalai, faafetai tele mo le avanoa, masalo e leai se isi manatu e toe faasilia. E tele lava tulaga ou te fia talanoa ai i le taua o lenei Matagaluega o le Va i Fafu, aemaise foi latou o lo o gafa ma mataupu fefaatauaiga i le va i fafo, ae peitai ua iai le manatu o le a taoto ae ao pea ona o tatou agai i le taliina o le fautuaga e pei ona aumai.

O le tulaga e pei ona iai le fautuaga, ia o lea foi sa ou vaavaai totoa lava iai, i le tulaga e pei ona taua ai se feteenaiga i le Tulafono e tusa ai ma le fautuaga ua tuuina mai. Atonu o se mea lea sa... you know e ao foi ona tatou talanoa e iai ni lape o mea, e le faapea o le a sao mea uma.

Ae e iai le manatu ua faamalieina le tulaga lea, ai sa mafai lava ona iloiloia ia le tele o Lipoti e pei ona tuuina mai, seivagana ai le vaega o le tupe lea na tali mai le Matagaluega ua toe tuuina mai i luma o le Palemene i le vaitaimi tonu lava o le Koviti. O le tulaga lea o iai, ae e iai le talitonuga a o iai ni faaletonu, ia o mea uma lava e agai mai i lalo o le tatou Treasury ona aumai, ia ua uma foi ua maea ona silasila iai ia le tatou Suetusi a le Malo.

O le tulaga i tagata faigaluega, pe toe maua pea ia ni o latou avanoa pei ona faafesiligia, ia o lo o maua pea avanoa e toe foi mai latou ma toe faigaluega. E pei o le masani lena, ia o nisi e o atu e faatino tulaga o tatou Ofisa i atunuu mamao, ia ona faapena foi pe 2 i le 3 tausaga toe foi mai, ia toe faafaigaluegae foi i totonu o le tatou Matagaluega.

Ia e momoli atu le agaga faafetai i lau afioga i le Taitaifono aemaise foi le Komiti mo lenei foi Lipoti. Ia e faamau pea le taua o lenei Matagaluega i le Tamaitai Pule le afioga ia Peseta, o se tasi foi o ao sinasina ua leva ona galue ma tautua i le tatou Malo, ia aemaise foi o le Pulega Lagolago. Faafetai i lau afioga i le Fofoga Fetalai.

FOFOGA FETALAI: Malo saunoa i lau afioga i le Sui Palemia. Ou te tapa lau afioga i le Taitaifono mo le lafo.

Afioga NIUAVA ETI L. MALOLO: Lau afioga i le Fofoga Fetalai, ae le i faatuina le lafo, avea lenei avanoa e momoli ai le faamalo ma le faafetai, i le Komiti foi o le Ofisa Sili o Pulega ma le Matagaluega, galuega faatino foi i le Tausaga Faaletupe sa iloilona, ia aemaise ai o taumafaiga uma ao feagai le atunuu ma aafiaga o le misela ma le Koviti-19.

E faamauina foi le agaga faafetai, ia le saili malo foi o nisi o sui o le Matagaluega ia ua mafai ona faamanuiaina i galuega mauululuga i atunuu mamao. E faamalo le galulue faamalo le tautua ia aua se manuia o Samoa.

E momoli foi le faamalo ma le agaga faafetai a le Komiti i tupu ma ee o le atunuu o lo o agalulue ma sui o le Malo i atunuu i fafo, i la outou tautua matavela. Faamanuia le Atua. O se laolao lelei foi e momoli ai le faafetai o le Komiti i le afioga i le Sui Taitaifono afioga ia Lautafi aemaise foi o sui mamalu o lenei Palemene, o lo o i totonu o lenei Komiti, ia faafetai i la outou galuega ma le tou auai mai, ia lea ua tini tauao ia le Lipoti e pei ona iai i lenei afiafi.

E momoli foi le agaga faafetai i le Susuga i le Failautusi o le Fono Aoaofaitulafono fesoasoani i la matou Komiti aemaise foi le agaga faafetai i le Ofisa o le Fono, ona o le tausiga foi ma le up to date foi o alauni a nai toeaia, ia ua fiafia ai lava latou e agai mai i a matou fonotaga.

Lau afioga i le Fofoga Fetalai ou te faatu le lafo, *Ina ia faamaonia e le Fono Aoaofaitulafono le P.P.2022/2023 Nu.51, Lipoti a le Komiti o le Vaega Tau i le Tamaoaiga, i le P.P. 2020/2021 Nu.111 Lipoti Faaletausaga a le Matagaluega o Mataupu Tau le Va i Fafo ma Fefaatauaiga mo le Tausaga Faaletupe 2019/2020;*

Faaluaina e le Minisita mo Galuega, Felauaiga ma Atinae Esese ma le sui usufono mamalu mai Falealili Nu.2.

Na faamaonia le lafo.

FOFOGA FETALAI: Ou te tapa lau afioga i le Sui Palemia mo le lafo o le Tali a le Malo.

Afioga Hon TUALA TEVAGA IOSEFO PONIFASIO: Lau afioga i le Fofoga Fetalai, ou te faatu le lafo, *Ina ia faamaonia e le Fono Aoaofaitulafono le Tali a le Malo i Fautuaga a le Komiti o le Vaega Tau i le Tamaoaiga, e pei ona ou tolaulauina.*

Faaluaina e le Minisita mo Faatoaga ma Faiga Faiva.

Na faamaonia le Tali a le Malo.

**P.P.2022/2023 NU.66, LIPOTI A LE KOMITI O LE VAEGA TAU
LE VA FEALOA I LE P.P.2020/2021 NU.13, LIPOTI
FAALETAUSAGA A LE FAALAPOTOPOTOGA FAAVAE TAU
FATUGAO A SAMOA MO LE TAUSAGA FAALETUPE
2020/2021**

**P.P.2022/2023 NU.161, TALI A LE MALO I LE P.P.2022/2023 NU.66,
LIPOTI A LE KOMITI O VAEGA TAU LE VA FEALOA I LE
P.P.2020/2021 NU.13, LIPOTI FAALETAUSAGA A LE
FAALAPOTOPOTOGA FAAVAE TAU FATUGAO A SAMOA MO LE
TAUSAGA FAALETUPE 2020/2021 - ILOILOGA**

FOFOGA FETALAI: Tulai mai lau afioga i le Taitaifono o le Komiti o le Vaega Tau Le Va Fealoai.

Afioga LAUMATIAMANU RINGO M. PURCELL: Lau afioga i le Fofoga Fetalai, ou te faatu le lafo, *Ina ia faautagia e le Fono Aoa o Lipoti a le Komiti o le Vaega Tau le Va Fealoai, o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Aana Alofi 1 ma le sui usufono mo Aana Alofi 3.

Na faamaonia le lafo.

FOFOGA FETALAI: Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga LAUMATIAMANU RINGO M. PURCELL: E faafetai i lau afioga i le Fofoga Fetalai mo le avanoa, ae ou te tulai lava ma le faaaloalo, e folasia le aotelega o sailiiliga a le Komiti i le P.P.2021/2022 Nu 13. Lipoti o Faalapotopotoga Faavae tau Fatugao a Samoa, Tausaga Faaletupe 2020/2021.

Aotelega o Sailiiliga:

Lau afioga i le Fofoga Fetalai, e pei ona folasia galuega na faatautaia e le Faalapotopotoga Faavae Tau Fatugao o Samoa tausaga faaletupe 2020/2021 i le lipoti a le Komiti. O le tuuina atu o le auaunaga mo le mamalu o le atunuu i auaunaga tau faamama toto, aemaise foi sailiiliga ma suesuega, ina ia mafai ona maua i latou ua aafia fatugao e faatino ai togafitiga i ona laasaga talafeagai i Tumua nei, aemaise foi o Puleono.

Faamatalaga o Tupe:

Lau afioga i le Fofoga Fetalai, sa faamauina e le Komiti, le mafai ona tuuina mai o le lipoti a le Ofisa o Pule Sili ma Suetusi i faamatalaga o tupe na maua ai. E \$8.2 miliona tupe maua a le Faalapotopotoga mo le tausaga faaletupe 2020/2021. Ma o se faasiliga \$330, 860 pe a faatusatusa i le \$7.8 miliona i le tausaga faaletupe 2019/2020. E \$8.1 miliona tupe faaalu a le Faalapotopotoga, ma o se faasiliga e \$702,959 pe a faatusatusa i le \$7.4 miliona i le tausaga faaletupe 2019/2020.

Mo le silafia e lau afioga, o le eseese o le lipoti leni ma le lipoti sa tatou i ai i le taeao 2019/2020 ona e eseese le aso sa faatalanoaina ai. ae tasi lava le taimi sa faatinoina ai asiasiga ia e lua. Na maua le avanoa e faatautaia ai se asiasiga a le Komiti i le maota gasegase i Salafai. Sa matauina e le Komiti le tatau ona fausia se maota gasegase fou ona o le vaapiapi, o le nofoaga o lo o i ai nei, aemaise foi o le manaomiaga o masini faamama toto, mo nai o tatou tagatanuu ua aofia fatugao.

Lau afioga i le Fofoga Fetalai, o fautuaga.

FAUTUAGA: I le maea ai o iloiloga a le Komiti Faa-Palemene o le Vaega Tau le Va Fealoai, na faaiugafonoina ai, ina ia fautuaina le Faalapotopotoga ma le Malo e faapea,

E fautuaina le Malo ina ia silasila i le fausia ai o se fale fou mo le Maota gasegase Faamama toto i Savaii, aua le tautuaina o le mamalu o le atunuu ua autovaa atu ai mo togafitiga.

E fautuaina e le Komiti le Malo ina ia silasila i le faatauina o ni isi masini faamama toto mo le Maota Faamama toto i Savaii.

IUGAFONO:

I le maea ai o iloiloga a le Komiti, na faaiugafonoina ai, e fautuaina le Fono Aoaofaitulafono ina ia faamaonia ma faautagia lana Lipoti ma Fautuaga i le, *P.P. 2021/2022 Nu.13, Lipoti faaletausaga a le Faalapotopotoga Faavae Tau Fatugao a Samoa tausaga faaletupe 2020/2021.*

Ma le faaaloalo lau afioga.

FOFOGA FETALAI: Malo faafetai lau afioga i le Taitaifono. Ou te tapa lau afioga, i le Minisita i le tali a lo tatou Malo.

Afioga Hon VALASI LUAPITOFANUA TOOGAMAGA TAFITO SELESELE: Lau afioga i le Fofoga Fetalai, ou te tolauluina tali a le Malo e faatatau i fautuaga a le Komiti o le Vaega Tau le Va Fealoai e pei ona folasia manino nei e le Taitaifono.

Lau afioga i le Fofoga Fetalai, ua maea ona ou tali i fautuaga ia, o le tali manino sa tuuina atu, o lo o i ai le tofa mamao a le Malo e pei ona

faatulaga mai foi i lena vaiatau o tulai mai lena Itu, o se vaai mamao ina ia fausia se fale tele po o falemai tutotonu o Salafai i Salelologa, aemaise o tulaga e pei ona i ai le soifua maloloina ma le tauaveina.

Ou te iloa ua manino faamatalaga sa tuuina atu muamua, ma o le a ou le tauaveina ia tali ma fautuaga e pei ona tuuina mai, o lea ua uma ona tali atu i le tulaga manino. E pei foi ona i ai le fautuaga e faatauina ni masini, o lea ua manino foi le tali i le taimi ua sola. Ia faafetai i le Taitaifono ma le Komiti mamalu i sailiiliga, ai o ona o le eseese o taimi na tuuina mai ai lipoti, a o le mea lava e tasi. Ia manuia tele le fonu.

FOFOGA FETALAI: Malo faafetai saunoa i lau afioga i le Minisita. Tapa lau afioga i le Taitaifono mo le lafo.

Afioga LAUMATIAMANU RINGO M. PURCELL: A o le i tuuina atu le lafo, e avea ia lenei avanoa e momoli atu ai le agaga faafetai, i le Komiti faafoe o le Sosaiete po o le Faalapotopotoga Faavae tau Fatugao, i la outou galuega fai aemaise o vaiatau sa feagai ai si o tatou atunuu ma le faamai. E momoli atu ai le agaga faafetai i le Komiti faafoe ae faapea foi le Ofisa Sili o Pulega, ma i latou o lo o galulue i le vaega o Faalapotopotoga Faavae Tau Fatugao. E momoli foi le faafetai tele i le Sui Taitaifono o le Komiti o le Va Fealoai, lau tofa Lenatai, ae faapea foi le komiti i le taumafaiga o le tatou komiti aemaise o fautuaga o lea ua faafofoga i ai le Maota nei. E momoli foi le agaga faafetai i le failautusi sa faamaumauina a tatou iugafono, aemaise o le Ofisa mamalu o le Fonu i le tapenaina foi o meataumafa i lea aso ma lea aso, ae faapea foi o matou alauni, faafetai tele.

Ae ou te tulai atu ma le faaaloalo e faatuina le lafo, *Ina ia faamaonia le P.P.2022/2023 Nu 66, Lipoti a le Komiti Tau le Va Fealoai, Lipoti a le Komiti P.P. 2020/2021 Nu 13, Lipoti Faaletausaga a le Faalapotopotoga Faavae Tau Fatugao a Samoa tausaga faaletupe 2020/2021.*

Ma le faaaloalo.

Faaluaina e le sui usufono mo Vaisigano 1 ma le sui usufono mo Aana Alofi 1.

Na faamaonia le lafo.

FOFOGA FETALAI: Ou te tapa lau afioga i le Minisita mo le lafo.

Afioga Hon VALASI LUAPITOFANUA TOGAMAGA TAFITO SELESELE: Lau afioga i le Fofoga Fetalai, ou te faatu le lafo, *Ina ia faamaonia nei e le Fonu Aoao le Tali a le Malo i Fautuaga a le Komiti o le Va Fealoai e pei ona ou tolaulauina.*

Faaluaaina e le Minisita mo Galuega, Felauaiga ma Atinae Eseese.

Na faamaonia le Tali a le Malo.

P.P.2022/2023 NU.93, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2020/2021 NU.74 MA LE P.P.2021/2022 NU.21, LIPOTI FAALETAUSAGA A LE KOMISI O GALUEGA A LE MALO MO LE TAUSAGA FAALETUPE 2019/2020 MA LE 2020/2021

P.P.2022/2023 NU.169, TALI A LE MALO I LE P.P.2022/2023 NU.93, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2020/2021 NU.74 MA LE P.P.2021/2022 NU.21, LIPOTI FAALETAUSAGA A LE KOMISI O GALUEGA A LE MALO MO LE TAUSAGA FAALETUPE 2019/2020 MA LE 2020/2021 - ILOILOGA

FOFOGA FETALAI: Tulai mai lau afioga i le Taitaifono, o le Komiti o Tulafono Tumau Mataupu tau Faiga Palota, Talosaga ma Tofiga Faale-Faavae.

Afioga AUUAPAAU MULIPOLA ALOITAFUA MULIPOLA: Lau afioga i le Fofoga Fetalai, ou te faatu le lafo, *Ina ia faautagia e le Fono Aoao le Lipoti a le Komiti o Tulafono Tumau Mataupu Tau Faiga Palota, Talosaga ma Tofiga Faale-Faavae o lo o tuuina atu ai Sailiiliga, Fautuaga ma Iugafono.*

Faaluaaina e le sui usufono mo Faleata 1 ma le sui usufono mo Vaimauga 2.

Na faamaonia le lafo.

FOFOGA FETALAI: Ou te tapa lau afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

Afioga AUUAPAAU MULIPOLA ALOITAFUA MULIPOLA: Ou te tulai ma le ava tele lau afioga i le Fofoga Fetalai, e faafetai tele mo le avanoa ua tuuina mai ia te au. E fai ai au ma sui o le matou Komiti e folasia le taunuuga o matou sailiiliga, o ni fautuaga aemaise o matou Iugafono.

Ou te muai faafeiloai i lau afioga i le Fofoga Fetalai, e faapea foi le afioga i le Sui Palemia, afio afioga i Minisita o le Kapeneta, afio le afioga i le Taitai o le Itu Agai faapea foi sui usufono mamalu o lenei Palemene. Ou te faatulou foi i le tapuaiga o Le Ao Mamalu o le Malo ma le masiofo.

Le Sui o le Fono o Sui Tofia, faapea le Faamasino sili ma le mamalu o le faamasinoga.

E faafeiloai atu foi i le tapuaiga mamalu a Ofisa Sili o Pulega o Matagaluega, Faalapotopotoga Tumaoti a le Malo ua mafai ona tatou faatasi i lenei afiafi. E ao foi ona ou afea le tapuaiga mamalu a Samoa, o lo o taputapu mai i faiva o le Palemene. Le paia o Aiga ma latou Tama, o Tama ma o latou Aiga. O le usoga a Tumua ma Pule, Ituau ma Alataua, Aiga i le Tai ma le Vaa o Fonoti. E faapea foi le tapuaiga o auuuna tofofi a le Atua, o lo o faafaletuluia i so o se Fatafaitaulaga. Lau afioga i le Fofoga Fetalai, ou te faaoioi atu ma le ava tele e tatau ai. E talu ai ona ua lagia Tupuatausi ma maota o le galuega a lenei itumalo. E maua le taimi ae le toe maua se avanoa. E avatu le faamaisega i le paia o le ekalesia EFKS i Salua tai lo tatou nuu, ona o le valaau paia a le Atua i lana auuuna sa tatou mafuta i le tele o tausaga, le susuga i le faafeagaiga ia Lima Maluelue Pone. O se lupe faalele aua le afio o Leatituiveve o le alo o Tuitele, afio Punemafua le Faasisina ma Toilolo, tama oe a le Malo, maliu mai le Fatutalia o le fofoga o le Alataua. Lau fetalai Savali o le tau tootoo, ma le nofo a fana o le Alataua. Ia faamaisega le Agaga o le Atua i le paia o le tatou ekalesia, a o le paia foi i le Pulega, i le susu o lau susuga i le Toeaina ma le nofo a falesa o le tatou pulega Aiga i le Tai. E taotolua foi le seuga ua maua tala ua lagia foi se tasi o maota e pei o le maota i Sa Tootoo, a o se pou foi o le Toafa, le paia o le Toafa o alii ma le Toalua o tulafale. E faamaisega foi le Agaga i le valaau paia a le Atua i lau susuga Mulipola. Ia faamaisega i lau susuga Leiataua lea sa tasi alii i le suafa.

Foi mai se faamatalaga i le lipoti o sailiiliga a lenei Komiti, o le ootootoga o sailiiliga a lenei Komiti, e lua lipoti faaletausaga a le Komiti, ma le Komisi o Galuega a le Malo sa iloilo. O le isi sa faataatia i luga o le Laulau-a-Fono i le aso 19 Ianuari 2021 ma le isi i le aso 18 Ianuari 2022. O nei lipoti lau afioga i le Fofoga Fetalai, o lo o lipoti ai faatinoga a le Ofisa ma taunuuga o tausaga faaletupe 2019/2020 ma le tausaga o le 2020/2021.

O Iugafono a le Komiti sa manatu ai ina ia iloilo faatasi nei tausaga faaletupe, aua o le a manino ai le eseese o galuega sa mafai ona faatinoina e le Ofisa, o tulaga na ausia aemaisega foi o luitau sa feagai ai.

Lau Afioga i le Fofoga Fetalai i le vaaiga aoatetele a le Komiti na maitauina ai le sosolo o faatinoga a le Ofisa i lana faamatalaga o sini autu ua maea faataatia.

I le molimau a le Ofisa e 84% o galuega fuafuaina sa mafai ona faatinoina. O se ootootoga o galuega faatino sa faaautu lava i vaega nei:

1. Faaleleia ma siitia tulaga o auuunaga.
2. Faaleleia faiga faavae mo le puleaina o tagata faigaluega.

3. Faamalosia ma siitia agavaa ma malosiaga mo tagata faigaluega.

Lau Afioga i le Fofoga Fetalai, sa faamauina e le Komiti i le luitau autu lava sa feagai ma le Ofisa i nei tausaga faaletupe, o le aafiaga o le siama o le Misela ma le faamai o le Koviti-19 lea sa aafia ai nisi o ana poloketi ma aoaoga sa fuafua.

Ona ou oo mai lea lau Afioga i itu na maitauina e le Komiti, o se vaega lenei mo le silafia e le Maota, o lo o faavae atu ai fautuaga a le Komiti.

Muamua lau Afioga o le aso sa iloiloaina ai Lipoti nei e le Ofisa sa faamauina ai e le i taulimaina e le Ofisa o le Failautusi o le Fono Aoao ni Tali a le Malo e uiga i fautuaga a le Komiti lenei i Paeaiga talu ai, i luga o ana Lipoti Faaletausaga mo Tausaga faaletupe 2014/2015 ma le 2017/2018.

Lona lua lau Afioga, i iloiloga a le Komiti na maitauina ai e le o tuuina mai ni faamatalaga o tupe a le Ofisa i totonu o ana Lipoti Faaletausaga. Peitai o se tulaga lea e taua tele mo le silafia e le Palemene.

O le vaega tolu lau Afioga e i ai vaega na maitauina e le Komiti sa aliae mai i tausaga faaletupe ua tuanai, peitai o lo o faamauina pea le tulai mai o vaega nei e aafia ai le utiuti o punaoa ma meafaigaluega talafeagai a le ofisa e faatino ai ana galuega, ua avea lea ma auala ua le mafai ai ona faatino nisi o ana poloketi ma ana polokalame sa fuafuaina. O lo o tuuina atu pea e le Kapeneta le faatinoina o faaiuga faaii o avanoa Ofisa Sili Lagolago o Pulega ma Pule Sili Lagolago ACEOs, Assistant Manager. Peitai o se fautuaga lea i le tele o tausaga ina ia taatia le vaega lea i le Komisi, vagana ai avanoa Ofisa Sili o Pulega ma Pule Sili e tuuina atu i le Kapeneta.

Ona ou oo mai lea i le vaega mulimuli sa maitauina e le Komiti lau Afioga, i Lipoti a le Ofisa sa iloiloaina, e i ai nisi o faaletonu sa maitauina, ma e manaomia le silasila i ai o le Ofisa ina ia faaleleia, ona o vaega nei e tatau ona taulamua ai le Ofisa, aua o faaletonu lava nei o lea o lo o maitauina foi lipoti faaletausaga a isi Matagaluega ma Ofisa sa iloiloaina e latou Komiti. O vaega la nei e aafia ai, e le manino ma sao atoatoa faamatalaga e faaoga i le ootoga o galuega faatino a le Ofisa, ma e leai foi ni faamatalaga auiliili e faamanino atili ai vaega taitasi. E le o faaogaina lanu faailoilo e faailoa mai ai le tulaga o lo o i ai le taunuuga o galuega sa fuafuaina ma tapulaa faatulagaina ina ia manino ai pe sa ausia pe sa le ausia po o le faaauau foi ona faatinoina. E le o fuafuaina lelei pasene e faailoa mai ai le aofai o so o se ituaiga sa faatinoina ina ia mautinoa ai o lo o sao le fua faatatau o galuega sa faatinoina ma le pasene ua taunuu i ai.

Lau Afioga i le Fofoga Fetalai ona ou oo mai lea i Fautuaga a lenei Komiti. I le faia i luga o ana Sailiiliga e fautuaina ai e le Komiti o Tulafono Tumau, Mataupu tau Faiga Palota, Talosaga ma Tofia Faale-Faavae le Malo ina ia:

Fautuaga 1

Silasila i le ave o le faataua a le Ofisa i le tuuina mai o tali (Tali a le Malo) i luga o fautuaga a le Komiti Faa-Palemene lenei o lo o tuuina atu i a latou Lipoti, e tusa ai o le iuga o a latou sailiiliga i Lipoti Faaletausaga a le Ofisa sa tuuina mai i le Fono Aoa ma iloiloa e le Komiti. O se tulaga e taua tele i le silaila a le Komiti ona o i e atagia ai le tulaga ua i ai le faatinoga ma le galuega a le Ofisa ua fai i se mataupu sa fautuaina ai e le Komiti lenei po o se isi lava Komiti Faa-Palemene, e pei ona matauina i ana iloiloa o nisi o mataupu sa fautuaina ai e le Komiti le Ofisa i tausaga faaletupe talu ai o lo o tulai mai pea ma e atagia ai e le faatinoina le tiute o le Ofisa.

Fautuaga 2

Silasila i le tuuina ma faamauina mai o Faamatalaga o Tupe a le Ofisa i totonu o ana Lipoti Faaletausaga e tuuina mai i le Fono Aoa, ina ia atagia ai taunuuga sa i ai ana faatinoga tau tupe i totonu o tausaga faaletupe sa iloiloa. E manatu le Komiti e taua tele lenei vaega ma e ao i le Ofisa ona ave i ai lana faataua, aemaise o le mulimulitaia o aiaiga faaletulafono ina ia mulimulitai ai isi Matagaluega ma Ofisa o le Malo.

Fautuaga 3

Silasila i le toe tuuina mai i le Komisi e latou te faatinoina faaiuga faaiu o avanoa o Ofisa Sili Lagolago o Pulega ma Pule Sili Lagolago, ACEOs ma Managers e pei ona tuuina atu i le Kapeneta latou te faatinoina i le taimi nei. E manatu le Komiti ua talafeagai le tuuina atu na o avanoa o Ofisa Sili o Pulega ma Pule Sili, CEOs ma Managers i le Kapeneta latou te faatinoina faaiuga. Ae mo avanoa lagolago ACEOs, e tataua ona faatinoina e le Komisi, ona o le latou matafaioi lea o le mataitu ma fuafuaina lelei o avanoa nei.

Fautuaga 4

Silasila i se faatulagaga po o se auivi e faaaogaina e faatino ai Lipoti Faaletausaga a Ofisa ma Matagaluega uma a le Malo, aemaise o le Ootootoga o Galuega Faatino i totonu o tausaga Faaletupe ina ia manino ma sao atoatoa. E manatu le Komiti o se tulaga e tataua ona taga tiutusa uma ai Lipoti Faaletausaga a Matagaluega ma Ofisa uma o le Malo ia le gata o auivi e faaaogaina, manino ma le sa'o o faamatalaga, faaaogaina o lanu faailoilo e faailoa ai le tulaga o lo o i ai le taunuuga o galuega sa fuafuaina pe ua ausia, faaauau, le i ausia foi, aemaise o le fuafua o le

faaaogaina o pasene i galuega sa faatinoina ina ia sao ma talafeagai e atagia ai le taunuuga ua i ai.

I le ma le vaega mulimuli lau Afioga i le Fofoga Fetalai i le Lipoti a le Komiti, lau Afioga o lana faaiugafono e faapea: *E fautuaina le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae le Fono Aoao ina ia faamaonia le P.P.2020/2021 Nu.74, Lipoti Faaletausaga a le Komisi o Galuega a le Malo 2019/2020 ma le P.P.2021/2022 Nu.21, Lipoti Faaletausaga a le Komisi o Galuega a le Malo 2020/2021.*

Lau Afioga ma le faaaloalo. Faafetai.

FOFOGA FETALAI: Malo saunoa i lau Afioga i le Taitaifono, ua tolaulau foi Sailiiliga aemaise o Fautuaga ua tuuina atu i le tatou Malo.

Ou te tapa lau Afioga i le Sui Palemia mo Tali a le tatou Malo.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te tolaulauina Tali a le Malo e faatatau i fautuaga a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae e pei ona folasia manino nei e le Taitaifono.

Lau Afioga i le Fofoga Fetalai, Tali a le Malo i le P.P.2022/2023 Nu.93, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.74 ma le P.P.2021/2022 Nu.21, Lipoti Faaletausaga a le Komisi o Galuega a le Malo 2019/2020 ma le 2020/2021.

E pei o fautuaga ua uma ona auiliiliina atu, o Tali nei e agai tonu lava i le Fautuaga 1 mo le Fautuaga 1.

Tali

E faamaonia e le Komisi le tuuina atu o Tali a le Malo i le Fautuaga na laga mo le Lipoti Faaletausaga 2014/2015 ma sa auala atu i le Taitaifono i lena taimi. O lo o faapipii atu se kopi mo le silafia, peitai, e toe tuuina atu e le Komisi i le faasologa o lena Lipoti mo faamaumauga a le Komiti.

O le tali i le Fautuaga Lona 2.

Tali

E talia e le Komisi Fautuaga, ma o le a mautinoa le galulue soosootauau ma le Matagaluega o Tupe ma le Ofisa Suetusi mo le faamaeaina o ana faamatalaga o tupe ma galuega faatino mo le faaofi i totonu o a tatou Lipoti Faaletausaga i le lumanai.

O le tali e tusa ai ma le Fautuaga 3

Fautuaga 3

E fautuaina e le Komisi le Fautuaga e pei ona tuuina mai. O lo o faagasolo nei galuega e tusa ai ma suiga ma iloiloa o lo o i ai nei a le Ofisa o le Komisi o Galuega a le Malo a o talia ai se faaiuga a le Afioga i le Palemia ma le Kapeneta.

O le tali a le Malo e tusa ai ma le Fautuaga Lona 4.

Tali

Ua faamauina e le Komisi le fautuaga mo se auivi masani mo Ofisa uma a le Malo ma Lipoti Faaletausaga a le Matagaluega.

Ma lou faaaloalo lava lau Afioga i le Fofoga Fetalai.

FOFOGA FETALAI: Malo faafetai mo tali manino foi a le tatou Malo e tusa foi o le tolaulaga a lau Afioga i le Sui Palemia.

Ia o le avanoa lenei mo le Maota. Se i tulai mai Aliimalemanu.

Afioga ALIIMALEMANU MOTI MOMOEMAUSU ALOFA TUUAU: Faafetai mo lou avanoa. Ou te tulai atu ma lou faaaloalo tele, ona o lea ua maitauina e lua Matagaluega e aafia i le tulaga lea o mea tau tupe, ona e le o aafia i totonu o a latou Lipoti Faaletausaga. Mo le silafia e le Maota, o le Tulafono lava ia o mea tau tupe, e fa masina talu le faaiuga o le tausaga i le aso 30 Iuni ua tataua ona maea le tapenaina o le Tala o le Tupe, ae ono masina, tusa lea o Tesema ua tataua ona aumai i totonu le tatou Lipoti Faaletausaga. Ou te talitonu la o le feteenaiga lea e alofa i Matagaluega i le tulaga lea e i ai, aua sa maua foi i le tele o nisi Lipoti e aumai a latou tala o tupe e aumai e le i audit ona o le taumafai lea ia latou mulimulitaia le Tulafono lea ia oo atu ia Tesema ua aumai i totonu a latou Lipoti, lea la e aumai ai e le audit ina le tele o Tala o Tupe ia e aumai latou Lipoti Faaletausaga.

A o lea ou te manatua, faatoa aumai tatou Audited Reports o le 2020 i le tausaga na tea nei ia Fepuari, ae ua leva ona i totonu Lipoti Faaletausaga a le tele o Matagaluega e tuli le taimi, due timelines ia e avatu e le Matagaluega o Tupe.

O le tuualalo la ma se fautuaga aua o lea e fa masina ua uma accounts, ono masina ua i totonu le Lipoti Faaletausaga e aua ai ne i toe feteenai, toe iloilo a tatou policies ia, faiga faavae ia i Tulafono o mea tau tupe ma Lipoti Faaletausaga ina ia aua ai ne i toe tulai mai tulaga ia. E lua lava mea e fai i ai, o le tasi lava o le mea e refer uma i ai Tala o Tupe a Matagaluega a le Malo ia na o public accounts ia e aumai e le Ministry of Finance, le Matagaluega o Tupe, po o le faatali o Lipoti Faaletausaga a tatou Matagaluega se i maea le audit ona aumai ai lea i totonu o latou Tala o le Tupe.

Ia o se tuualalo, tatou te mafaufau foi i ai ma e o lo o feagai ma ia tulaga, ina ia aua ai ne i toe tulai mai ia faafitauli. Ma le faaaloalo lava lau Afioga i le Fofoga Fetalai.

FOFOGA FETALAI: Malo mo le fautuaga ma se tasi foi o Komiti o Tupe. E manaia foi le fautuaga mo le silafia e le Maota.
Ia, ou te tapa lau Afioga i le Taitaifono mo le lafo.

Afioga AUUAPAAU MULIPOLA ALOITAFUA MULIPOLA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa P.P.2022/2023 Nu.93, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.74 & P.P.2021/2022 Nu.21, Lipoti Faaletausaga a le Komisi o Galuega a le Malo mo Tausaga Faaletupe 2019/2020 & 2020/2021.*

Faaluaina e le sui usufono mamalu mo Gagaiformauga 2 ma le sui usufono mo Faleata 1.

Na faamaonia le lafo.

FOFOGA FETALAI: Ou te tapa lau Afioga i le Sui Palemia mo le lafo i le Tali a le Malo.

Afioga Hon TUALA TEVAGA IOSEFO PONIFASIO: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae e pei ona ou tolaulauina atu.*

Faaluaina e le Minisita mo Galuega, Felauaiga ma Atinae Eeseese ma le Minisita mo le Soifua Maloloina.

Na faamaonia le Tali a le Malo.

P.P.2022/2023 NU.114, LIPOTI A LE KOMITI O LE VAEGA TAU LE TAMAOAIGA I LE P.P.2021/2022 NU.50, LIPOTI FAALETAUSAGA A LE MATAGALUEGA O PISINISI, ALAMANUIA MA LEIPA MO LE TAUSAGA FAALETUPE 2020/2021

P.P.2022/2023 NU.72, TALI A LE MALO I LE P.P.2022/2023 NU.114, LIPOTI A LE KOMITI A LE VAEGA TAU LE TAMAOAIGA I LE P.P.2021/2022 NU.50, LIPOTI FAALETAUSAGA A LE

**MATAGALUEGA O PISINISI, ALAMANUIA MA LEIPA MO LE
TAUSAGA FAALETUPE 2020/2021 – ILOILOGA**

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Tamaoaiga.

Afioga NIUAVA ETI L. MALOLO: Lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Lipoti a le Komiti o le Vaega Tau le Tamaoaiga o lo o tuuina atu ai ana Sailiiliga, Fautuaga ma Iugafono.*

Faaluaina e le Minisita mo Galuega, Felauaiga ma Atinae Eseese ma le sui usufono mo Falealili 2.

Na faamaonia le lafo.

FOFOGA FETALAI: Ia, ua ou manatu o lea ua tatou taunuu i le tatou taimi malolo e pei ona i ai le tatou lafo, ae toe tasi lava le tatou Lipoti lea e totoe ma le tolaulauga o le Lipoti lea ona maea loa lea o le tatou galuega. O le mea lea faamalo faafetai i le tatou Maota, malo lo outou onosai.

E momoli atu lava le faafetai tele i lo outou paia ma lo outou mamalu i lo outou lavapapale ma le onosai i le tau faamaeaina o le tatou galuega. Faafetai mo finagalo faaalua e tusa o tatou felafolafoaiga.

Ou te faamalulu atu i lau Afioga i le Taitai o le Itu Agai e tusa o le lafo na e taumafai mai ai. O le manaoga lava o le Fofoga Fetalai ina ia mafai pea ona faafofoga mai le atunuu i Sailiiliga ma Fautuaga a le tatou Palemene e ala i Komiti ma le tali mai foi a le tatou Malo i fautuaga. O lea ua iu manuia le tatou Fono. Faamalo faafetai usufono i le tatou Maota. Sa i ai le naunautaiga e fia faamaea le tatou galuega i le afiafi nei, peitai ua alofa atu ua leva ona faaaaogagase le paia o le Palemene i lena vaiaso seia oo mai foi i le afiafi nei, talosia ia le aso a taeao i le alofa o le Atua e faamaea ai.

E faafetai atu i Ofisa Sili o Pulega o Matagaluega ma Faalapotopotoga Tumaoti a le tatou Malo, malo le onosai mo le tapuaia o le alofaiva o lau Palemene. Faafetai Samoa i lau tapuaiga, o lea ua iu ma le manuia le Fono a lau Palemene, faafetai tatalo, faamalo tapuai.

Pe afai ua i ai se gagana a lau Palemene ua sopoutu, ia alofagia ma faamagalalo. A o le matou tatalo faaauau, ia tuliloaina pea si o tatou atunuu i aao faaloaloa o le Atua, ma ia i ai ana faamanuiaga i lo outou ulufale ma le ulufale. Manuteleina lena afiafi.

Manuia le afifio atu o le paia o le tatou Maota i lena afiafi, tautai le Alii i ala uma o le a uia.

Ae tatou te le i tolopo ou te tatalo atu i le Afioga i le sui usufono mo Sagaga 2 se i e saunia se tatou tatalo.

Na tolopo Taulumaga a le Fono Aoao i le itula e 6:04 i le afiafi seia aulia le Aso Lulu, 15 Mati 2023 i le itula e 9:30 i le taeao.